

Marqqoosa Xaafide

Yesuus Kiristtoosa Wonggele

Gele

Marqqoosa Wonggele, «Hyay Xoozze na7a Yesuus Kiristtoosa Wonggele dentstse» yaga7i tiinii dentsane. Hyanna Wonggelte Yesuusa oocha asin adetits wolqqa aden maaqqii shi-igida. E adetits wolqqita E timirtite, tuna ayyaanalla afa yeze wolqqiten asuntsana nagarappa maarizanne benttida. Yesuusa, «Taanii, asuntsana nagara arotitsappa kessodes tanatit-sito aatsii inggodes yi7ide As Na7a» yaga7i fa doonara ohida.

Marqqoosa Yesuusa taarikito luule ogeran wolqqa kumide ogera ohida. Marqqoosa Yesuusa qaalton timirtito maaqqikaayzin E oochchide gaama qofize oochito tiinzi ohida. Marqqoosa Xammaqize Wahannisa taarikito, Yesuusa xinqgate E fattaninttidanno hyaatara ohi maaqqii, Yesuusa timirttiton E fatstsizanno dalggizii ohida. Aqii aqii hyammadera Yesuusa tamarunsi Yesu-
usa loytsii erii erii hyanggida, yezin Yesuusa
ixxizunsi wozzii ixzii ixzii hyanggida. Hyal7e
zofanunsi Yesuusa yessi hyaase saamintte folint-
tide oochchiti baz ohine. Yentsesin E suxintton E
dendditi baz ohine. Wonggele faaditsite tegera
benttide zofanunsi fettii fettii maxaafite xalaala
yene.

Aafe Qofunsi

Wonggele dentstse 1:1-13

Yesuusa Galila sa7a fa oocha aykkidanno 1:14—
9:50

Yesuusa Yerusalaame oochchide oocha 10:1-52
Wurssutsi saamintta Yerusalaame kara gancce
11:1—15:47

Yesuusa hyayqoppa denddito 16:1-8

Hyayqoppa denddide Laatstse qonccitsin Salo
keze 16:9-20

Xammaqize Wahannisa oge giigizane

(Maato. 3:1-12; Luqa. 3:1-18; Waha. 1:19-28)

¹ Hyay Xoozze Na7a Yesuus Kiristtoosa
Wonggele dentstse.

² Nabe Isayaasa xaafide maxaafite Xoozii,
«Yikke, taanii ta Kiitanchcho
neepa tiino dakkoda.
E ne ogito giigisada.

³ Fetay akko baayze ganasa fa qaaltto dhoqi yiizii,
«Laatstse ogito giigizote;
E yedhdhade wustto
ees giigizote gayda» »
yagayda.

⁴ Xammaqize Wahannisa asuntsana xammaqit-
tera, «Yin nagartippa maaqqii xammaqinttote;
Xoozii yin nagartto atto ga7oda» yaga7i qaala
ohitera akko baayze ganasara yi7ida.

⁵ Yihuda sa7a yeze asuntsi ubban Yerusalaame
katama asuntsi ubba Wahannisago ye7ine. Fa na-
gartto faaxin, Wahannisa untana Yorddanoosa
borkka xammaqida.

⁶ Wahannisa gimale isintseppa dadinttide afula ma77ida. Fa qazintte saqqe danccida; mahi boolen dekeru shida mu7ida.

⁷ Wahannisa qaala ohitera, «Taappa suubara damma miinggize ye7ine. Melle atto yezin, taanii E caamma gaadiza zuggii billodes beezoos.

⁸ Taanii yinttana hyaatsara xammaqane, yezin E yinttana Geeshi Ayyaanara xammaqoda» ya-gayda.

Yesuusa Xammaqintton fattaninttidanno

(Maato. 3:13-17; 4:1-11; Luqa. 3:21-22; 4:1-13)

⁹ Yesuusa ye wode Galila awrajja yeze Naazirete katamappa yi7in, Wahannisa Yorddaanosu borkka xammaqida.

¹⁰ Yesuusa hyaatsitippa kezze wode salo bu-gunttin, Geeshi Ayyaana eella afa wolle gaara wodhdhoderu bi7ida.

¹¹ Mahi saloppa, «Taanii kadhize ta na7ay nena; ta neella ufayttane» yagaaze qaala yi7ida.

¹² Iira Geeshi Ayyaana Yesuusa akko baayze ganasa kanggida.

¹³ Yesuusa akko baayze ganasa Xalahera fat-taninttitera oyttam qamma gam7ida. Xootsara yezida, yezin kiitanchchuntsi yi7i eza maaddida.

Yesuusa molo aykkize oyddii asuntsana xeeqida

(Maato. 4:12-22; Luqa. 4:14-15; 5:1-11)

¹⁴ Wahannisa acinttidannippa suuba Yesu-usa Xoozze ka7itumo Wonggele ohitera Galila awrajja qitida.

¹⁵ Ize, «Wode yellida; Xoozze ka7itumo ukkida. Yin nagarttippa maaqqii, Wonggele ammanote» yagayda.

¹⁶ Yesuusa Galila Abba kalera aadhitera, molo aykkize, Simoonaran E ishe Inddirasera, fa gitito* Abba olizuntsana bi7ida.

¹⁷ Unttago, «Tana kaallote; ta yinttana as ayfo tamaanarsoda» yagayda

¹⁸ Unttii iira fa gitito olii ashshii Yesuusa kaallida.

¹⁹ Yesuusa eeratsi tiino hyanggi, lam77i ishuntsana Zabdoosa na7untsana, Yayqoobaran Wahannisara gongge gidida fa gitito giigizuntsana bi7ida.

²⁰ E untana bi7ide gaar xeeqida. Un fa adaya Zabdoosan, ees oochchizuntsara gongge gidida olii ashshii Yesuusa kaallii qitida.

Tuna ayyaana aykkide atstse faxida

(Luqa. 4:31-37)

²¹ Unttii Qifirnaoome katama yellida. Sambata gelide gaar Yesuusa ellisii Ayhude woosa keetsta gelii tamaanarsse aykkida.

²² Adetits wolqqara yeze asi fana tamaanarsanep attin higge asttamaanunts fana tamaanarssoosse gisho asuntsi E timirttite gaama qoppida.

²³ Ye wode tuna ayyaana aykkide fettii atstse Ayhude woosa keetsta gelii fa qaaltto dhoqi yeyzi,

²⁴ «Naazirete Yesuusa, neenii nuuppa akko koye? Nuna dhabssodes ne yi7ida? Ne oona yezako ta erane; ne Xoozze Geeshi.» Yagayda.

1:15 Maato. 3:2 * **1:16** Gite: Molo aykkize afula aazize baz.
1:22 Maato. 7:28

²⁵ Yesuusa ye tuna ayyaanza, «Hyayzo, hyay atstseppa kezo» ga7i seerida.

²⁶ Tuna ayyaana attsa labbizii, wuysizii ezappa kezida.

²⁷ Asuntsi ubba gaama qoppii, «Hyanna akko? Hyay atstse fa adetits wolqqara melle atto yezin tuna ayyaanan kiittane. Unttii ees kiittinttane; hyanna akko kille timirtte?» yaga7i, fa gidda fete feta oocida.

²⁸ Yesuusa markkatitsita ellisii Galila sa7a yeze guta ubba kezida.

*Yesuusa gaama hyargginttizuntsana fatstsida
(Maato. 8:14-17; Luqa. 4:38-41)*

²⁹ Yesuusa Ayhude woosa keetstsappa kezii, Yayqoobaran Wahannisanan Simoona karan Inddirase kara qitida.

³⁰ Simoona machchiti intta damma ottsi michara hyarggintti woy7idanno Yesuusa ize yellin ees ohida.

³¹ E iigo shiiqii, I kushito aykkii, izo dentsii es-sida. Ottsi michita ashshin iza untana mukkida.

³² Hyargginttide asuntsanan tuna ayyaana aykkide asuntsana ubba ugre awa gelin eego ki7ida.

³³ Katamite yeze asunts ubbuntsi yinna keetsiti bale shiiqida.

³⁴ Yesuusa dumma dumma hyarggera aykint-tide gaama asuntsana fattsi, gaama tuna ayyaanuntsana kessida. E oode yezako tuna ayyaanuntsi eride gisho untana ohaame fana kayda.

*Yesuusa Galila tamarssida
(Luqa. 4:42-44)*

³⁵ Yesuusa wontti maatse denddii, asi baayze bessa hyanggi, ize Xooz woossida.

³⁶ Simoonaran eera yezuntsi eza koyitera qitida.

³⁷ Unttii eza denggi, «Asi ubba nena koyane» yagayda.

³⁸ Yesuusa mahi untтана, «Yinna gutute yeze seko katamite yedhdhote. Taanii yi7idanna Wonggele ohodes maaqqide gisho ize yeze guta ohodes beezane» yagayda.

³⁹ Ayhude woosa keetsta qaala ohiteran tuna ayyaanuntsana kessitera, Galila sa7a ubba wutida.

*Yesuusa qursuma hyargginttiza fatstsida
(Maato. 8:1-4; Luqa. 5:12-17)*

⁴⁰ Qursuma hyargge aykkide fettii atstse Yesu-usago yi7i, E tiintte bunqqunttii, «Neenii koyko tana geeshodes dandda7ane» yaga7i woossida.

⁴¹ Yesuusa ees yiqsinttii, fa kushito dakkii eza bochchi, «Taanii kadhane, geezho» yagayda.

⁴² Iira qursumtta atsta dakkin atstse geezhida.

⁴³ Yesuusa atsta mintsii naagintto ga7i kessii dakkida.

⁴⁴ Yesuusa eza, «Nena ero, hyanno oodesin ohippe. Yezin hyanggi ne galtto kahine beezo. Neenii hyatte geeshi maaqqidanno asuntsana er-sodes, Muse kiittide zharshito zharsho» yagayda.

⁴⁵ Yezin attsay hyanggi, kara gancce as ub-buntsis ohida. Yinnii gisho, Yesuusa benttii kezii, katama gelodes dandda7ikaaya. Yezin asi baayze

bessa gaxa yezida; mahi asuntsi ubba fa yeze
bessappa eego ye7ine.

2

Yesuusa wobbo attsa fatstsida

(Maato. 9:1-8; Luqa. 5:17-26)

¹ Eeratsi gammappa suuba Yesuusa Qifirna-
hoome maaqqii, keetsta yene gaaze wore sint-
tida.

² Asuntsana keetstsita ekkaanxxi ixxin, melle
atto yezin balttan un7ode wontsis gaama asuntsi
shiiqin, Yesuusa qaala tamarssane.

³ Oyddii asunts fettii wobbo attsa tookkii eego
ki7ida.

⁴ Asuntsi gaanggide gisho attsa Yesuusago shi-
ishodes untis dandda7inttanxi ixxin, Yesuusa
yeze zalara keetsti aaf to tookkii attsa E woy7ide
alggizera sulle ketstsii Yesuusa tiintte gaddida.

⁵ Yesuusa un ammantto bi7i, ye wobbo attsa,
«Ta na7ayo, ne nagartta atto ga7inttida» yagayda.

⁶ Higge asttamaaruntsappa yinna besite bettide
fete fete fa wozintte,

⁷ «Naate hyay atstse hyannii gaar iita baz
Xoozalla akkos ohe? Xoozza xalaalap attin melle
oode nagara atto ga7odes dandda7ize?» ga7i
qoppida.

⁸ Unttii fa wozintte yinnii gaara qoppidanno
Yesuusa iira fa ayyaantte erii, unttago, «Yinttii yin
wozintte akkos hyannigaara qoppete?

⁹ Wobbo attsa, «Ne nagartta atto ga7inttida»
gaazanna ukkeene? Woy, «Denddii eqqii ne
alggiza tookkii qito» gaazanna ukke?

¹⁰ Yezin taas, As Na7ays, sa7alla afa nagara atto ga7odes adetits wolqqa yezanno yin erode gaar» ga7i ye wobbo attsa,

¹¹ «Nena gaane, denddii eqqii ne alggiza tookkii ne kara qito» yagayda.

¹² Atstse ellisii denddii eqqii, fa alggiza tookkii asi ubba be7izin qitida. Asuntsi ubba gaama qoppii, «Nuunii hyannii gaar gaama qofize baz bi7i eroos» yaga7i Xooz galatida.

Yesuusa Leewe xegida

(Maato. 9:9-13; Luqa. 5:27-32)

¹³ Yesuusa mahi Galila Abba gaxa hyanggi, faago yi7ide asuntsana ubba tamarssida.

¹⁴ Iira aadhitera, Ilfiyoosa na7ay Leewe ga7inttize qaraxe gachchize besite bettidaya bi7i, «Tana kaallo» yagayda. Leewize denddii eqqii eza kaallida.

¹⁵ Yesuusa kattsa ma7ades Lewii keetsta bettida. Eza kaallize asuntsi gaama maaqqide gisho qaraxe gachchize gaama asuntsin nagaranchchuntsi eeran E tamaruntsara wolla bettida.

¹⁶ Higge asttamaare maaqqide fettii fettii Farisaawuntsi Yesuusa nagaranchchuntsaran qaraxe gachchizuntsara kattsa ma7adera bi7i, «E akkos nagaranchchuntsaran qaraxe gachchizuntsara kattsa me7e?» yaga7i, E tamaruntsana oocida.

¹⁷ Yesuusa un gaazanno si7i, «Hyargginttizis fattin faxas akime koshshoos. Taanii nagaranchchuntsana xegodes yiiddap attin xilluntsana xegodes yi7ikaaya» yaga7i untis mahida.

Xooma baz erodes shiiqide ooce
(Maato. 9:14-17; Luqa. 5:33-39)

18 Xammaqize Wahannisa tamaaruntsin Farisaawuntsi xoomane. Fettii fettii asunts Yesuusago yi7i, «Wahannisa tamaaruntsin Farisaawunts tamaaruntsi xoomane, yezin ne tamaaruntsi akkos xoomoso?» yagayda.

19 Yesuusa unttago, «Sarge yi7ide asunts machcho ekkize untara yezin, xoomodes dandda7ane? Machcho ekkize untara yezin, xoomodes dandda7oos.

20 Yezin machcho ekkize un kaleppa ekinttodes wode ye7oda, un ye wode xoomoda.

21 «Gal7a ma7olla kille carqqe gaddii sikkize asi baaya. Gaddii sikkikon, killize gal7a ma7iza feedhane; feedhitsitan kasennippa aadhane.

22 Mahi mal7antto woyne gal7a silphe gujjize asi baaya. Mahi gujjikon, ye woynize silphiza feedhane, faasin lanttane, silphizen iitane. Yezin mal7antto woyne kille silphe gujjinttane» yagayda.

Sambbata baz erodes shiiqide ooce
(Maato. 12:1-8; Luqa. 6:1-5)

23 Yesuusa fettii Sambbata qamma bangga gade giddara aadhodera, E tamaaruntsi eera hyanggit-era bangga tizha shiccii dha7ane.

24 Farisaawuntsi Yesuusago, «Yikke, ne tamaarunts Sambbata qamma woga baayze baz akkos oochche?» yagayda.

²⁵ Yesuusa unttago, «Dawute naydhdhii, muuze baz koyde wode faara yezuntsara oochchidanno ne nabbabika?

²⁶ Abiyaatar kahinunts hyalaqa maaqqii yeze wode Dawute Xoozze keetsta gelii, kahinunts xalaala ma7adep attin ooden ma7ades woga baayzanno Laatstse tiino gaddide daabbuto mu7ida, faara yezuntsisin inggida» yagayda.

²⁷ Mahin Yesuusa unttago, «Sambbata as na7a maades ga7i medhinttidap attin asi Sambbatas medhinttikaaya.

²⁸ Yinnii gisho, As Na7ay, melle atto yezin Sambbataasin Laatstsii» yagayda.

3

*Yesuusa kushe gundda attsa fatstsida
(Maato. 12:9-14; Luqa. 6:6-11)*

¹ Yesuusa Ayhude woosa keetsta maaqqii gelida. Ize kushe gunddide fettii asi yene.

² Fettii fettii asuntsi Yesuusa mootodes kezii, kushe gunddide attsa Sambbata wode E fatstikon ashshiko ga7i be7ades koyi mintsii naagane.

³ Yesuusa kushe gunddide attsa, «Denddii eqqii hyankka gidda yo7o» yagayda.

⁴ Yinnippa suuba, asuntsago, «Sambbata wode lo77o baz oochchizanna wogaane iita baz oochchizanna woga? As shemppo ashshizannone woy wodhizanno?» yaga7i oocida.

Yezin asuntsi si77i gayda.

⁵ Yesuusa antsinttii, untana wututsii dakkii bi7i, un ohin si7oosuntsana maaqqide gisho untalla afa gaama zhilidhdhida. Ye atstsego, «Ne kuciza fiddii yiizo» yagayda. Ezii fiddii yiizin E kucizen faxida.

⁶ Ellisii Farisaawuntsi Ayhude woosa keetst-sappa bale kezii, Yesuusa wayzi wodhod yezako zorintodes Heroodisa bagguuntsara fettii bessa shiiqida.

Asuntsi Yesuusago shiiqida

⁷ Yesuusa fa tamaruntsara Galila Abbago hyanggida. Galilappan Yihudappa yi7ide gaama asuntsi eza kaallida.

⁸ Mahin Yerusalaameppa, Edumiyasappa, Yorddaanosa borkka fintsappa, Xiroosa katamappan Sidoona katamappa Yesuusa oochchidanno si7i, gaama asuntsi eego yi7ida.

⁹ Asi gaanggidannippa denddii eza un7itsaame fana E tamaruntsi gongge ees giigisade gaar kiittida.

¹⁰ Gaama asuntsana E fatstside gisho hyarggint-tize asunts ubba eza bochchodes urqqinttane.

¹¹ Tuna ayyaana aykkide asuntsi eza bi7ide wode E tiintte bunqitii, fa qaalto dhoqi yiizii, «Neenii Xoozze Na7a baane?» yagayda.

¹² Yesuusa gaama wode tuna ayyaanuntsi fa oonatitsito qonccizaame fana untana mintsii kiittida.

Yesuusa taphpho lam77i hawaaruntsana doorida

(Maato. 10:1-4; Luqa. 6:12-16)

¹³ Yesuusa derella afa kezii, fa koyze asuntsana faago xeeqida; untin eego shiiqida.

¹⁴ Un faara yessade gaaran qaala tamarssode gaar taphpho lam77untsana doorii, untana, «Hawaare»^{*} ga7i suntsida.

¹⁵ Tuna ayyaana kessode gaar untis adetitsi wolqqa inggida.

¹⁶ E dooride taphpho lam77untsi hyantsesana: Phexiroosa ga7i suntside Simoona,

¹⁷ Bo7anergges (Dada aazize asuntsana) yaga7i suntsiduntsana, Zabdoosa na7unts Yayqoobaran Yayqooba ishe Wahannisa,

¹⁸ Inddirase, Filphoosa, Barttolomiyoosa, Maatoosa, Toomaasa, Ilfiyoosa na7a Yayqooba, Taadiyosa, Kananeppa yi7ide Simoonara,

¹⁹ Yesuusa aatsii inggide Asqorootu Yihuda.

Yesuusan Bi7elzebuulan

(Maato. 12:22-32; Luqa. 11:14-23; 12:10)

²⁰ Yinnippa suuba, Yesuusa kara hyanggida. Mahi gaama asunts shiiqin, ezin E tamarunts melle atto yezin katsta ma7adesin un dandda7ikaaya.

²¹ Asunts eza, «Zhaashtane» gaaze gisho E iginuntsi yinno si7i eza ekkodes hyanggida.

²² Higge asttamaruntsappa fete fete Yerusalaameppa yi7i, «Eella afa Bi7elzebuula yene», E, «Xalahe wolqqara tuna ayyaana kessane» yaga7i wolla ohinttida.

²³ Yesuusa asuntsana faago xeezii aazizer ohida. «Xalahe Xalahe wayzi kessodes dandda7e?

^{*} **3:14 Hawaare:** Hawaare gaazanna kiitinttiduntsana ga7e.

3:22 Maato. 9:34; 10:25

²⁴ Fettii ka7itumo fa gidda shaakkinttiko yinna ka7itumtta eqqodes dandda7oos.

²⁵ Yinnii gaara, fettii keetsta asuntsi fa gidda shaakkinttiko dhabodap attin yessades dandda7oos.

²⁶ Yikke, Xalahe faara kacinttii shaakkinttiko dhabodap attin yessades dandda7oos.

²⁷ «Yinnii gaara tiino wolqqar yeze attsa accikaayzara E keetsta gelii, E qoltto bonqodes dandda7ize asi baaya. Accii maaqqii E keetsito bonqodes dandda7ane.

²⁸ «Taanii yinttis turo ohine; Xoozii as na7untsis nagara ubbannon un cazhize cashito ubba atto ga7oda.

²⁹ Yezin Geeshi Ayyaanalla iita baz ohize medhinas nagara gale maaqqadep attin Xoozii mulon eza maaroos» yagayda.

³⁰ Yesuusa yinno ga7idanna, fettii fettii asunts, «Eella afa tuna ayyaana yene» yagayde gisho.

*Yesuusa intton E ishuntsanan
(Maato. 12:46-50; Luqa. 8:19-21)*

³¹ E inttan E ishuntsin yi7i bale eqqii, eego asi kiittii eza xeevida.

³² E kale bettide gaama asuntsi, «Yikke, ne inttan ne ishuntsin bale eqqii nena koyane» yagayda.

³³ Yesuusa mahi, «ta intta oode? Mahi ta ishuntsin aanuntsana?» yagayda.

³⁴ Fa kantte bettide asuntsana wututsii dakkii bi7i, «Yikke, ta inttan ta ishuntsin hyantsesana.

³⁵ Xoozze qofa oochchize ubbuntsi taas ishen, taas mishon taas inddo» yagayda.

4

Budutsi budize atstse aazize (Maato. 13:1-9; Luqa. 8:4-8)

¹ Yesuusa mahi Galila Abba kale tamaanrassane. Gaama asunts E kantte wutii shiiqin, abballa yeze gonggite gelii bettida, asunts ubba Abba kale yene.

² E untana gaama baz aazizera tamaanrssida. Tamaanrssitera hyannigaara yagayda:

³ «Yikke! Fettii atstse buduttsi budodes kezida.

⁴ E budodera, fettii fettii buduttsita oge gaxa wodhdhida; Landda yi7i mu7ida.

⁵ Fettii fettii buduttsita forchcho sa7alla wodhdhida. Gaama sa7a baayze gisho yinna buduttsita ellisii dolida.

⁶ Yezin awa kezze wode shullida. Loytsii xapho dakkikaayze gisho ellisii melida.

⁷ Fettii fettii buduttsita anggatsi gidda wodhdhida. Dolidanno anggatsita diccii cuullide gisho aafe aafikaayzara attida.

⁸ Fettii fettii buduttsita aradda sa7a wodhdhii dolida. Diccii fete hyasttam, fete izippun tam fete xeet aafida» yagayda.

⁹ «Si7ize hyaye yeze ooden si7o» yagayda.

Yesuusa aazizera akko ohezako (Maato. 13:10-17; Luqa. 8:9-10)

¹⁰ Yesuusa ohidanno si7ide fettii fettii asuntsi taphpho lam77i tamaanrantsara yezunts Yesuusa fa xalaala yessadera, eego shiiqii yinna aazizitis bilitsito oocida.

¹¹ Yesuusa unttago hyannii gaar yagayda: «Yinttis Xoozze ka7itumo gaatsi qofa erodes inggintida. Yezin melluntsis ka7itumoppa balera yezuntsis ubba bazi aazizera ohinttane.

¹² Hyanna hyanidanna,
«Unttii be7ine, yezin denggoos.
Si7ine, yezin tiiroos.
Unttii denggizakon tiirzako,
Xoozago maaqqada
ezin untтана maaroda yeshsha»
yagayda.

*Budutsi aazize bilitsito
(Maato. 13:18-23; Luqa. 8:11-15)*

¹³ Yesuusa unttago, «Hyanna aazizta yinttis geloso? Yeezin, aazize ubba yin wayzi tiirode?

¹⁴ Budizay Xoozze qaala budane.

¹⁵ Qaala budinttize wode oge gaxa wodhdhidunts qaala si7izuntsana. Yezin Xalahe iira yi7i, un wozintte budinttide qaaltto maxii hayaasane.

¹⁶ Yinnii gaara, forchcho sa7a budinttide qaala si7i, ellisii ufaytti ekkizuntsana.

¹⁷ Yezin unttis mintsii xapho baayze gisho hyattes fattin gam7oos. Eerats wodeppa suuba qaala gisho madhan woy baytstsii yellide wode ellisii dhubunttane.

¹⁸ Anggatsi gidida budinttide qaala si7izuntsana.

¹⁹ Yezin hyanna sa7a yessis yirggan, durtumo kadhen dumma dumma amotitsi un wozintte gelii qaaltto cuullize gisho aafe aafikaayzara attida.

²⁰ Yezin aradda sa7a budunttezuunsi qaala si7i ekkizuntsana. Unttii fete hyasttam, fete izipuntam fete xeet aafida» yagayda.

Aachichcha yeze xomppe
(Luqa. 8:16-18)

²¹ Yesuusa gujji, «Xomppe ekkii, gabate gidida woy algga oomo gaddize asi yene? Dhoqqa besa gaddosaane?

²² Yikke, aachinttide baz ubba qoncce kessada; aachinttide baz ubba erinttikaayzara attaama.

²³ Si7ize hyaye yeze ooden si7o» yagayda.

²⁴ Mahi unttago, «Yin si7ize baz qofar si7ote! Xoozze qaala yin si7izanni fana E yinttis qofa inggoda. Yinttis makkizanne gaantsi inggoda.

²⁵ Yeze atstses gaantsi ingginttoda, baayze atstseppa melle atto yezin, ees yeze yinna eeratsitan ekinttoda» yagayda.

Diccize budutstsi aazize

²⁶ Yesuusa mahi, «Xoozze ka7itumo fa gadite budutstsi budize atstse fana.

²⁷ Ye atstse qamma genttane wontta denddane. E fa ommite wayzakon erikaayzara yessadera yinna budutsita dolii diccane.

²⁸ Gaditan katstsa fa faas inggane. Tiino dolii diccane, suubite aafodes gambbuxane, wurssut-site kumutsi aafe aafane.

²⁹ Yezin katsita yellide wode atstse maxane» yagayda.

4:21 Maato. 5:15; Luqa. 11:33 **4:22** Maato. 10:26; Luqa. 12:2

4:25 Maato. 13:12; 25:29; Luqa. 19:26 **4:29** Iyu. 3:13

*Aafe eeratsi minxa aazize**(Maato. 13:31-34; Luqa. 13:18-19)*

³⁰ Yesuusa, «Nuunii Xoozze ka7itumo akko fana ga7ode? Woy akkora aazissade?

³¹ Xoozze ka7itumo aafe eerats minxa aazane. Ye minxa aafize budize wode sa7alla yeze minxa aafe ubbappa laafane.

³² Budin dolii minxa ubbappa dammane; damma daashi daazhane. Landduntsi E tirshitilla afa keexxii bettode wontsis daazhane» yagayda.

³³ Yesuusa hyannii gaar gaama aazizera asunts tiirodes dandda7ode gaar qaala ohida.

³⁴ Asuntsis aazize baytsi ohoos. Yezin Yesuusa fa tamaruntsara xalaala yeze wode untis ub-babazito billii ohida.

*Yesuusa abba zuluntto si7i yiizida**(Maato. 8:23-27; Luqa. 8:22-25)*

³⁵ Ye wode sa7ita ugurin, Yesuusa fa tamaruntsago, «Abbappa seko gaxa fiinggoda» gayda.

³⁶ E tamarunts gaama asuntsana olii ashshii ashshii, Yesuusa tiino gelii bettode gonggize gidda gelii Yesuusa faara ekkii qitida. Melle gong-guntsin ize yene.

³⁷ Damma gote denddii, zuluntta gonggiza gu-uddin, hyaatsita kumode wontsis gonggize gidda gelida.

³⁸ Ye wode Yesuusa gonggizes suuba zalara borkkotsi gaddii genttida. E tamarunts eza barkkizii, «Astamaazayo, nu dhabize wode nena yiqsosaane?» yagayda.

³⁹ Yezin, E barkki zuluntto, «Seerii», abbizan, «Si7i ga7o» yagayda. Zulunttan si77i ga7in ubba bazi woppu gayda.

⁴⁰ Yesuusa fa tamaruntsago, «Akkos hyan-nigaara zhashitete? Yinttis ammano wayzi dhabido?» yagayda.

⁴¹ Unttii gaama zhashtii fa gidda, «Hyay melle atto yezin, goten abban kiitinttize oode?» yagayda.

5

Tuna ayyaana aykkide atstse faxida (Maato. 8:28-34; Luqa. 8:26-39)

¹ Yesuusan E tamaruntsi abba fiinggi, Gergge-soone gaaze sa7a yellida.

² Yesuusa gonggizeppa wodhdhize wode tuna ayyaana aykkide fettii atstse boozappa kezii eera yellinttida.

³ Ye atstse booza gidda aqii feezhii yene. Eza ooden gaadera accodes dandda7oos.

⁴ E gaama tohe duullaran santsalaatara acinttii yene. Yezin santsalaaton duutsane, duullizan mentsitsane. Eza mahodes dandda7ize ooden baaya.

⁵ E gamman awara yinna booziten derellan wuyssane, fa galtton shuchchara qawuxane.

⁶ Yesuusa hyaakora bi7ide wode woxxi hyanggi E tiintte bunqunttida.

⁷ Ye atstse fa qaaltto dhoqi yiizii, «Ubbappa kattara yeze Xoozze Na7a Yesuusa, neera tana akko yeltsize? Tana dhabssaame gaar taanii nena Xoozze suntsite woossane» yagayda.

⁸ E yinno gaydanna Yesuusa eza, «Naate hyay tuna ayyaanzayo, hyay atstseppa kezo» yagayde gisho.

⁹ Yesuusa eego, «Ne suntsita oode?» yaga7i oocida.

E, «Nuunii gaama maaqqide gisho ta suntsita Leegiyona» yagayda.

¹⁰ Tuna ayyaanuntsi fana yinna gaditippa kessii dakkaame gaar Yesuusa mintsii woossida.

¹¹ Ye derizella gaama gudayille wude yenggintane.

¹² Tuna ayyaanuntsi Yesuusago, «Nuna sekka gudayille wudute dakkoya, un gidda hyanggi geloda» yaga7i woossida.

¹³ Yesuusa unttago, «Qitote» yagayda. Yeezin tuna ayyaanuntsi atstseppa kezii gudayluntsi gidda gelida. Lam77i mukul maaqqade gudayille wude gaga doonara woxxi hyanggi abba gelii qoodhdhinttida.

¹⁴ Gudayille wude yenggizuntsi woxxi hyanggi hyanidanno katamaran gaxarera ohida. Yezin asuntsi hyanidanno be7ades kezida.

¹⁵ Asuntsi Yesuusago ye7ize wode tuna Ayyaana aykinttide attsa bi7ida. E fa wozintte maaqqii, ma7o ma77i, ize bettidanno be7ize wode ubbuntsi zhashtida.

¹⁶ Yinno bi7ide gaar asuntsi tuna ayyaanuntsi aykkide atstsella afan gudayluntsalla afa hyanidanno ubba asuntsis ohida.

¹⁷ Yinnii gisho, asunts fa sa7itippa Yesuusa kezode gaar woossida.

¹⁸ Yesuusa gonggite gelze wode tiino tuna ayyaana aykkii dakkide atstse, Yesuusara hyang-godes eza woossida.

¹⁹ Yezin Yesuusa ixxi eego, «Ne kara maaqqii, Laatstsii nees akko gaar damma baz oochcheza-kon akko gaar maarezako ne kara asuntsis oho» yagayda.

²⁰ Attsay hyanggi Taphphi Katama ga7inttize sa7a wutii, Yesuusa faas akko gaar damma baz oochchezako ohida. E ohidanno si7ide asunts ubbuntsi gaama qoppida.

Hyayqide na7iton Yesuusa ma7ito bochchide maachito

(Maato. 9:18-26; Luqa. 8:40-56)

²¹ Yesuusa maaqqii, gongge gelii, abba fiinggi-dannippa suuba gaama asuntsi abba gaxa E kale wutii shiiqida.

²² Iyaroosa gaaze Ayhude woosa Keettsa hyalaquntsappa fete, Yesuusa bi7ide wode eego yi7i E tohitilla afa

²³ gol7i, «Ta naata hyargginttii hyayqqodes yi7ine. Iza faxii yessade gaar yi7i ne kushito iilla afa gaddoya» yaga7i Yesuusa mintsii woossida.

²⁴ Yesuusa Iyaroosara qitida. E hyammadera gaama asuntsi Eza kaallii un7itsida.

²⁵ Taphpho lam77i bere I gallitippa suutsi gog-gize fettii maachita yene.

²⁶ Gaama akimuntsi izo akimida, yezin iza faxa ka7inttida. Iza fa qoltto ubba hyaasinin iisi hyanka iitidap attin akkon maaddikaaya.

²⁷ Yinna maachita Yesuusa baz si7i, asuntsana aadhii Yesuusa suubara yi7i E ma7ito bochchida.

28 Iza, «Taanii melle atto yezin E ma7ito bochchizako faxoda» ga7i qoppida.

29 Iippa goggize suutsita iira eqqii attida. Iza fa waaytippa faxidanno fa gallite erida.

30 Yesuusa iira faappa wolqqa kezidanno fa ommite erii, gaama as gidda suub maaqqii, «Ta ma7ito bochchide oode?» yagayda.

31 E tamarunsi, «Asunsi nena urqqizanno bi7itera, «Wayzi tana oode bochchide ga7e?» » yagayda.

32 Yesuusa yinno oonii oochchezako be7ades wututsii dakkii bi7ida.

33 Yezin maachita faas hyanidanno erii, zhashimora goqitera yi7i Yesuusa tiintte gol7ida; mahi hyanidanno ubba turtto ees ohida.

34 Yeyin, Yesuusa iigo, «Na7ite, nena ne am-mantta fatstsida, sarora qito, ne waaytippa faxo» yagayda.

35 Yesuusa hyaga yinno ohodera, Ayhude woosa Keetsta hyalaqa karappa kiitinttide asunsi yi7i, «Ne naata hyayqqida, asttamaariza akkos lab-bize?» yagayda.

36 Yezin Yesuusa un gaazanno si7i, Ayhude woosa Keetsta hyalaqizogo, «Ammano xalaala ammanop attin zhashtippe» yagayda.

37 Yesuusa Phexiroosappa, Yayqoobappan Yayqooba ishe Wahannisappa melle ooden fana kaallaame gaar kayda.

38 Unttii Ayhude woosa Keetsta hyalaqize kara yellide wode Yesuusa asunsi wozina dhabii yeekkezuntanan zeeluntana bi7ida.

39 Gelii asuntsago, «Akkos muuzhii yeekkete? Naata genttidap attin hyayqqikaaya» yagayda.

⁴⁰ Asuntsi eella afa miicida. Yezin asuntsana ubba bale kessii, naatii adayan, intton hyaydzdzii taaaruntsana faara ekkii naata yeze besite gelida.

⁴¹ Yesuusa naatii kushito aykkii, «Xaalita, quumii» (Eeratsi na7ite, nena gaane denddo) ya-gayda.

⁴² Naata iira denddii eqqii yedhdhida. Iza taphpho lam77i bere na7a. Yinne asuntsi gaama qoppida.

⁴³ Yesuusa yinno un oodesin ohaame gaar untana mintsii kiittida. Untii iis mu7ize baz immade gaar ohida.

6

Yesuusa Naazirete ixintida (Maato. 13:53-58; Luqa. 4:16-30)

¹ Yesuusa izippa kezii, fa taaaruntsana kaal-itsi, fa katama Naazirete yi7ida.

² Sambbata wode Ayhude woosa Keetsta tamaarsse aykkida. E taaarssizanno si7ide gaama asuntsi gaama qoppii, «Hyay hyanno ubba abappa denggido? Hyanna cinccatitsita ees anapp inginttido? Hyanna E kushite oochinttize kille bazito oochchize wolqqa Ees oonii inggido?

³ Hyay anaaxe na7a baane? Mayrami na7a, Yayqooba, Yoosa, Yihudan Simoona ishe baane? E mishuntsi nuura hyanne yezuntsana baane?» yaga7i, E gaazanno si7anxi ixxida.

⁴ Yesuusa yentsi asuntsago, «Nabe fa gade, fa iginuntsi giddan fa kara asunts gidda bonchch-inttoos fattin melluntsi kale bonchchinttane» yagayda.

⁵ E yinna besite fa kushito eeratsi asuntsalla afa gaddii fattsidannip attin melle gaama qofize baz oochchodes dandda7ikaaya.

⁶ Asuntsi ammanikaayze gisho gaama qoppida. Yinnippa suuba Yesuusa yinna gutute yeze asuntsana tamaarssane.

Yesuusa taphpho lam77i tamaruntsana kiittida

(Maato. 10:5-15; Luqa. 9:1-6)

⁷ Yesuusa taphpho lam77i tamaruntsana faago xegii, lam77i lam77i mahi kiittida. Unttis tuna ayyaanalla adetits wolqqa inggida.

⁸ Unttana, «Oges gufep attin kattsa, karxite, yin kiiste bira akko bazin aykkippete.

⁹ Yin tohite caamma aatstsote, fattin lam77i afula aykkippete» yagayda.

¹⁰ Mahin, «Yinttana asi mukkize keettsa aba maaqqikon yinna bessitippa kezii qitode wontsis yinna keettsite gam7ote.

¹¹ Yinttana asi mokkoosse besa woy yin ohizanno si7oosse besa aban maaqqiko, yinna sa7ite yeze asuntsis yin markka maaqqade gaar yinna bessitippa kezitera, yin tohite yeze xurito fixxote» yagayda.

¹² Taphpho lam77i tamaruntsi hyanggi, asuntsi fa nagartippa maaqqade gaar qaala ohida.

¹³ Unttii asappa gaama tuna Ayyaana kessida. Gaama hyargginttizuntsana zayte tizhii fatstsida.

Xammaqize Wahannisa hyayqo

(Maato. 14:1-12; Luqa. 9:7-9)

¹⁴ Yesuusa suntsita ubba bessa kezide gisho Kaat Heroodisa E baz si7ida. Fettii fettii asuntsi, «Xammaqize Wahannisa hyayqoppa denddida, yinnii gisho hyanna kille bazito oochchize eza» yagayda.

¹⁵ Bagguntsi, «Hyay Eeliyaasa» yagayda.

Melluntsi mahi, «Hyay zaga wode nabuntsappa fetaya» yagayda.

¹⁶ Yezin Heroodisa yinno si7ide wode «Hyay taanii afurto gachchizide Xammaqize Wahannisa. E hyayqoppa denddida» yagayda.

¹⁷ Heroodisa fa ishe Filphoosa machchito Heroodiyada ekkide gisho I mikinaatis Wahannisa aytstsii accizida.

¹⁸ Wahannisa Heroodisago, «Neenii ne ishe machchito ekkodes beezoos» yagayda.

¹⁹ Heroodiyada Wahannisa fa wozintte ixxi eza wodhissades koyda, yezin dandda7ikaaya.

²⁰ Wahannisa xillon geeshi as maaqqidanno Heroodisa eride gisho ees zhashtii loytsii naagizane. Heroodisa Wahannisa gaaze baz si7ize wode tannane. Yezin ufaytti si7ine.

²¹ Heroodisa fa yelinttide qammito bonchodes gade ahizuntsana, shaalaquntsisi Galila yeze damma asuntsis diggisa giigizida. Yinna Heroodiyadas wottize wode maaqqida.

²² Heroodiyada na7ita zaqquntsi mokunttize keetsta gelii durii, Heroodisan E zaquntsana ufayssida. Kaatize naatigo, «Ne koyze akko maaqqikon tana ooco, ta nees inggoda» yagayda.

²³ Mahi iisi caaqqii, «Neenii oocize akko maaqqikon, taanii nees inggoda. Melle atto yezin, ta ka7itumtti baggito maaqqikon ta nees inggoda» yagayda.

²⁴ Naata bale kezii fa inttigo, «Akko inggo gawune?» ga7i oocida.

I intta, «Xammaqize Wahannisa ommito inggo ga7o» yagayda.

²⁵ Naata ellisii kaatizego hyanggi, «Xammaqize Wahannisa ommito saane gidda gaddii hyatte taas immade gaar koyane» gayda.

²⁶ Yaga7in Kaatize gaama zhilidhdhida, yezin fa zaqqunts gisho iisi caaqqide fa caaqito ashshodes koykaaya.

²⁷ Yinnii gisho, ellisii naagizego Wahannisa ommito ko7ode gaar kiittida. Naagizen achchi keetsta hyanggi Wahannisa afurtto gachchida.

²⁸ Ye gachchinttide ommiza saane gidda gaddii ki7i naatis inggida. Naata mahi fa inttis inggida.

²⁹ Wahannisa tamaruntsi yinno si7ide wode hyanggi E ahito ekkii kanggi moogida.

Yesuusa ichchin mukul asuntsana muuzida

(Maato. 14:13-21; Luqa. 9:10-17; Waha. 6:1-

14)

³⁰ Taphpho lam77i hawaaruntsi maaqqii yi7i un oochidannon tamarssidanno ubba Yesu-usas ohida.

³¹ Unttago yi7ize asuntsin qitize asuntsi gaang-gide gisho Yesuusaran E tamaruntsara, melle

atto yezin kattsa maadesin untana yeltsanxi
ixxida. Yeyin, Yesuusa unttago, «Ye7ote wolla
eeratsi shempodes asi baayze bessa yedhdhote»
yagayda.

³² Yinnii gisho, untii fa faas gongge gelii asi
baayze bessa qitida.

³³ Untii hyammadera gaama asuntsi untana
bi7i erida. Yezin, katama ubbappa asuntsi tohera
woxxii hyanggi un qitize bessito untappa tiinii
yellida.

³⁴ Yesuusa gonggizeppa wodhdhii gaama
asuntsana bi7ida. Asuntsi yenggize asi baayze
duro fana maaqqidanno bi7i untis yiqsinttii
untana gaama baz tamarssida.

³⁵ Sa7ita ugurize wode Yesuusa tamaruntsi
eego yi7i, «Hyanna bessita asi baayze bessi; hyatte
sa7itan qammida.

³⁶ Asuntsi kara ganccen katama hyanggi faas
muuze baz wongode gaar asuntsana dakko»
yagayda.

³⁷ Yezin Yesuusa mahi unttago, «Asuntsis
muuze baz yin inggote» yagayda.

Un, «Nuunii hyanggi lam77i xeet dinaarer*
boora wonggi asuntsana muuzode gaar koyane?»
yaga7i oocida.

³⁸ Yesuusa unttago, «Yinttis wantsi boora yeze?
Ane hyanggi bo7ote» yagayda.

Untii bi7i, «Ichchin booran lam77i molon» ya-
gayda.

6:34 Faydo 27:17; 1 Kat. 22:17; Hiz. 34:5; Maato. 9:36 * **6:37**
Dinaare gaaze fettii asis oochchii feezhidannis ingginttize bira

³⁹ Yesuusa fa tamaruntsana asuntsana ubba gachcho gachcho tagii betitsode gaar kiittida.

⁴⁰ Asuntsi baggita xeet, bagita ichintam maaqqii likkera likkera tagintti bettida.

⁴¹ Yesuusa ichchin boortton lam77i moluntsana ekkii, ude salo bi7i Xooz galatida. Boortto baxxi asuntsis yeltsode gaar tamaruntsis ingida. Mahi lam77i moluntsana un ubbuntsis gishida.

⁴² Asunts ubba mu7i mizhida.

⁴³ Attide boora gupan molo gufan, E tamaruntsi taphpho lam77i leemate kumutsi dentstsida.

⁴⁴ Boortto mu7ide dhiiratsi asuntsi xalaala ichchin mukul maaqqada.

Yesuusa abballa afa yedhdhida

(Maato. 14:22-33; Waha. 6:15-21)

⁴⁵ Ellisii Yesuusa fa tamaruntsi gongge gelii, abbappa seko fintsa yeze Beetesayda faappa tiinii qitode gaar kiittida. Yezin faas asuntsana moyzodes suub attida.

⁴⁶ Asuntsana moyzidannippa suuba Xooz woosodes derella afa kezida.

⁴⁷ Sa7ita qammize wode gonggize abba gidida yene, yezin Yesuusa abbappa gaxa faas yene.

⁴⁸ Baqo E tamaruntsago baqize gisho abba fidhizanna waaysizanno Yesuusa bi7ida. Wontti maatse Lukule oollodes yi7ize wode E abballa afa yedhdhitera unttago yi7i, untana olii aadhades koyda.

⁴⁹ Yezin E abballa afa yedhdhadera, un bi7i, unttis meeshe aazin uukkida.

⁵⁰ Un ubbuntsi eza bi7i, zhashmora tannida.

Yezin Yesuusa ellisii unttago, «Tana, akkon baaya; zhashtippete» yagayda.

⁵¹ E gongge gelii untara wolla bettin baqita woppu gayda. Unttii gaama qoppida.

⁵² Un wozintta doccide gisho un boorttii baz tiirikaaya.

Yesuusa Gensareexe hyargginttizuntsana fatst-sida

(Maato. 14:34-36)

⁵³ Unttii abba fiinggi, Gensareexe sa7a yellii, gonggiza gaxalla shiishii accida.

⁵⁴ Unttii gonggizeppa wodhdhize wode asunts ellisii Yesuusa erida.

⁵⁵ Unttii kara gancce yeze sa7a ubba woxxii yellii hyargginttizuntsana shanchafara tookkii, «Yesuusa yene» ga7in si7ide besite ki7ida.

⁵⁶ Asuntsi E hyanggide keetsta ubba, gaxare maaqqikon, katama, yeze hyargginttizuntsana asi shiiqize bessa kangane. Hyargganchchuntsii E afula macartto maaqqikon bochchode gaar asuntsi eza woossida. Bochchide ubbuntsi faxida.

7

Zaga adunts woga

(Maato. 15:1-9)

¹ Yerusalaameppa yi7ide fettii fettii Farisaawuntsin higge asttamaaruntsin Yesuusa kale shiiqida.

² Yesuusa tamaaruntsappa fete fete geezhikaayze kushera, yinnan kushe meeccikaayzara katsta muuzuntsana un bi7ida.

³ Farisaawuntsin Ayhude asunts ubba fa adunts wogiti gaar fa kushito meeccikaayzara mo7oos.

⁴ Yinnii gaara, un gabeppa wonggi maaqqii meeccinttikaayzar mo7oos. Mahi un fa aduntsappa ekkide melle gaama woga yene: yinnan sine, xaaro, meqo miishe datsan geeshize woga naagane.

⁵ Farisaawuntsin higge asttamaaruntsin Yesu-
usa, «Ne tamaaruntsi akkos adunts woga mentsii
fa kushito meeccikaayzara kattsa me7e?» yaga7i
oocida.

⁶ Yesuusa unttago, «Isayaasa yin cubbuntso,
«Hyantsi asuntsi tana fa doonara xalaala
bonchchanep,
attin un wozintta taappa hyaako yene.

⁷ Asi medhdhide woga Xoozze higge aazizi
tamaarssize gisho
un tana hyappo goynane»
ga7i xaafide tinbita turo.

⁸ «Yinttii Xoozze kiita ashshii as woga naagane»
yagayda.

⁹ Mahin Yesuusa, «Yin yin woga naagii Xoozze
kiitto olii ashshodes lo77o oge denggida.

¹⁰ Muse, «Ne adayan ne intton bonchcho», mahi
«Fa adayan woy fa intto cazhide hyayqqodes
beezane» yagayda.

¹¹ Yezin fettii asi fa adayan woy fa intton
maaddodanno ashshii, «Yinna Xoozze zharsho»
ga7iko,

¹² E fa adayan woy fa intton maaddaame gaar
oochchane.

13 Yinnii gaara, yin melluntsana tamaarsside yin wogitira Xoozze qaala leqqida. Yinnii fana melle gaama baz oochchane» yagayda.

*As tunize baz
(Maato. 15:10-20)*

14 Yesuusa gaama asuntsana mahi faago xeezii, «Ubbuntsi ta ohizanno si7ote tirote.

15 As wozinappa kezza baz asi tunizanep attin baleppa as saza gelii asi tunize akkon baaya.

16 Si7ize hyaye yeze ooden si7o» yagayda.*

17 Yesuusa gaama asuntsana ashshii ashshii keetsta gelin E tamaruntsi yinna aaziziti baz eza oocida.

18 E unttago, «Yintisin mahi gelikaane? Baleppa as wozina gelize akko bazin asi tunissades dandda7osanna gelosaane?

19 Akkos gayko, katsta as saza gidda gelii fa ogitira aadhanep attin as wozina gidda geloos» yagayda. Yinne Yesuusa katsta ubba geeshi maaqqizanno ersida.

20 Kaallii, Yesuusa, «Asi tunize baz as wozina giddappa kezza baz.

21 As wozina giddappa kezza bazi iita qofa, gome woy7e, kayzo, as wodhe,

22 olale, zhinbbartimo, iitatitsi, gene, qayxe, cimo, qana7e, cashshi, uturan boozatitsi.

23 Hyanna iitabazita ubba as wozina giddappa kezii asi tunizane» yagayda.

*Fettii maachiti ammano
(Maato. 15:21-28)*

* 7:16 Faydo 16 Grike maxaafe baaya.

24 Yesuusa yinnippa kezii, Xiroosa katama kale yeze sa7a qitida. E fettii keetstsa gelii ize yezanno ooden erode gaar koyikaaya. Yinno maaqqikon aachintti gam77odes dandda7ikaaya.

25 Yezin I eeratsi na7ito tuna ayyaana aykkide fettii maachita Yesuusa baz si7i ellisii eego yi7i E tohitilla afa gol7ida.

26 Iza yelinttidanna Sooriya gidda Finqqe gaaze sa7a yelinttide Grike maacho. Iza, fa naatippa tuna ayyaanza kessode gaar Yesuusa woossida.

27 Yezin Yesuusa mahi, «Na7untsi tiinidhii katstsa mu7i mizho; na7unts katsito ekkii kanuntsis olizanna lo77o maaqqoos» yagayda.

28 Maachita mahi, «Ta Laatstsayo yinna turo, yezin leemate kale yeze kanuntsi na7untsappa wodhdhide gufto muune» yagayda.

29 Yesuusa mahi iigo, «Hyanno ne ohide gisho ne kara qito; tuna ayyaanze ne naatippa kezida» yagayda.

30 Maachita fa kara hyanggize wode tuna ayyaanze naatippa kezin yitstsa woy7idanno bi7ida.

Yesuusa tullen doona muume atstsa fatstsida

31 Yesuusa Xiroosa katamappa kezii, Sidoonaran Taphphi Katama gaaze sa7ara aadhii Galila Abbago qitida.

32 Asuntsi tullen doona muume asi Yesuusago ki7i, fa kushito eella gaddode gaar eza woossida.

33 Yesuusa faas ye atstsa gaama asappa gaxa kessii, fa gil7iza E hyayte dakkida. Mahi cuchchi cuttii E il7antsito bochchida.

³⁴ Salo ude bi7i, gaddii shemppii, «Eftah» gayda. Bilitsitan «Bugunto» ga7e.

³⁵ Atstse hyayta ellisii buginttida, acinttide il7antsitan bilinttida, atstse geeshi ohinttida.

³⁶ Yesuusa asuntsago, «Hyanno oodesin ohippete» yagayda. Yezin E gaama mintsii ohippete ga7in, asuntsi ohito gode gaantsida.

³⁷ Yinno si7ide asuntsi ubba gaama qoppii, «Ubbabazito E loytsii oochchane. Melle atto yezin, tulliza sissane, muumiza ohizane» yagayda.

8

Yesuusa oyddii mukul asuntsana muuzida (Maato. 15:32-39)

¹ Eerats wodeppa suuba, gaama asuntsi Yesu-usago shiiqida. Asuntsis mu7izebaz dhabin Yesu-usa fa taaaruntsana faago xeezii,

² «Hyantsi asuntsi taara hyaydzdzii gamma yellodes gam7i, akkon muuze baz denggikaayze gisho tana asunts bazita yiqsane.

³ Taanii asuntsana nayera kara dakkiko asunts hyanggitara oge labbii gol7oda, bagge asuntsi hyaako bessappa yi7ida» yagayda.

⁴ Yesuusa taaarunts mahi, «Hyanna akko baayze ganasa hyantsi asuntsana ubba muus-sades maaqqade katsta denggodes dandda7ode oode?» yagayda.

⁵ Yesuusa unttago, «Yin kale wantsi boora yeze?» ga7i oocida.

Un mahi, «Laappun boora yene» yagayda.

⁶ Yesuusa asunts sa7alla bettode gaar kiit-tida. Yeyzi, laappun boorto ekkii Xooz galatii

maaqqii boortto baxxi, asuntsana yeltsode gaar fa tamaaruntsis inggida. E tamaarunts asuntsis gizhida.

⁷ Unttis mahi eeratsin yishsha molunts yene. Yesuusa yentsi molunts gisho Xooz galatii, asuntsis yeltsode gaar fa tamaaruntsana kiittida.

⁸ Asunts ubbuntsi mu7i mizhida. E tamaaruntsi mu7in attide gufa laappun leemate kumutsi dentsida.

⁹ Katstsa mu7ide asunts faydita oyddii mukul maaqqada. Yinnippa suuba, Yesuusa asuntsana moyzida.

¹⁰ E mahi fa tamaaruntsara ellisii gongge gelii Dalmmanuuta gaaze sa7a qitida.

Malla oochinttode gaar oocida
(Maato. 16:1-4)

¹¹ Farisaawuntsi yi7i Yesuusa oocodes koyi, saloppa fana malla beessade gaar Yesuusara lalle aykkida.

¹² Yesuusa gaddii shemppii, «Hyanna wode asuntsi akkos malla koye? Taanii yinttis turo ohine; hyanna wode asuntsis akko mallan inginttoos» yagayda.

¹³ E untтана ize olii ashshii mahi gongge gelii abbappa seko fintsa fiinggida.

Farisaawuntsin Heroodisa irshsho
(Maato. 16:5-12)

¹⁴ E tamaaruntsi katstsa aykkodanno botida; unttis gongge gidda fettii boorappa melle baaya.

15 Yesuusa unttago, «Yinttana erote. Farisaawunts irshitippan Heroodisa irshitippa naaginttote» yaga7i kiittida.

16 Un wol gidida, «E hyanno gaazanna nuus boora baayze gisho» yagayda.

17 Yesuusa un gaazanno erii unttago, «Yinttis boora baayze gisho akkos ohintte? Hyatten erosite? Woy tiirosite? Yin wozintta doccida?

18 Yinttis aafe yezin bo7osite? Hyaye yezin si7osite? Yin tiirane?

19 Taanii ichchin boora ichchin mukul asuntsis yeltsize wode wantsi leemate kumutsi gufa dentsido?» yagayda.

Unttin, «Taphpho lam77i leemate kumutsi» yagayda.

20 «Yinnii gaara, taanii laappun boora oyddii mukul asuntsis yeltside wode wantsi leemate kumutsi gufa dentsido?» yagayda.

Un, «Laappun leemate kumutsi dentsida» yagayda.

21 Yeezin, «Hyatten tiirikaane?» yagayda.

Yesuusa Beetesayda fettii qooqe fatstsida

22 Unttii Beetesayda katama qitida. Eerats asuntsi qooqe attsa Yesuusago ki7i ye attsa girmode gaar eza woossida.

23 Yesuusa qooqe atstse kushito aykkii katamappa gaxa kessida. E aafte cuttii fa kushito aafitilla afa gaddii, «Nees akko bentthane?» yaga7i oocida.

24 Attsay dhoqi ga7i bi7i, «Taas asunts bentthane, yezin asuntsi minxa gaar en7ane» yagayda.

²⁵ Yinnippa suuba, Yesuusa mahi, atstse aafte fa kushito gaddida. Attsayin loytsii bi7ida, faxin ubba baz shaakkii bi7ida.

²⁶ Yesuusa atstsego, «Ne kara qito, yezin katama gelippe» yaga7i kiittida.

Phexiroosa markkatitsito
(Maato. 16:13-20; Luqa. 9:18-21)

²⁷ Yesuusa fa tamaaruntsara Qisaariya Filphoosa kale yeze kara gancce qitida. Unttii hyammadera ogella yezin Yesuusa, «Tana asuntsi oona ga7e?» yaga7i fa tamaaruntsana oocida.

²⁸ E tamaaruntsi, «Fettii fettii asuntsi nena, «Xammaqize Wahannisa» gaane; melluntsi, «Eliyaasa gaane» mahi melluntsi, «Nabuntsappa feta» gaane» yagayda.

²⁹ Yesuusa unttago, «Yeezin yin tana oona ga7e?» yaga7i oocida.

Phexiroosa, «Neenii Kiristtoosa*» yaga7i mahida.

³⁰ Yesuusa, «Ta baz oodesin ohippete» yaga7i untana kiittida.

Yesuusa fana yellode madhan waaye ohida
(Maato. 16:21-28; Luqa. 9:22-27)

³¹ Yesuusa fa tamaaruntsago, «As Na7ay, gaama madha ekkodes beezane; cimuntsi, kahinunts hyalaquntsin higge asttamaaruntsi eza ixnodes beezane. Unttii eza wodhodesin hyaydzdzii qammappa suuba, E hyayqoppa denddodes beezane» yaga7i untana tamarssida.

8:28 Mar. 6:14 * **8:29** Kiristtoosa ga7intizanna meesii bilitsitan tizhinttidaya ga7e

³² E yinno unttis loytsii ohida. Phexiroosa eza fettii zala mahi kaccida.

³³ Yezin Yesuusa suuba maaqqii, fa tamaruntsana bi7i, Phexiroosa kaccii, «Hyay Xalahizay, taappa hyaakko. Neenii asi kadhizebaz qoppanep attin Xoozii kadhizebaz qoppoos» yagayda.

Yesuusa kaallodes fana zharshe beezane

(Maato. 10:38-39; 16:24-28; Luqa. 9:23-27; 14:26-27)

³⁴ Mahika Yesuusa gaama asin fa tamaruntsana faago xeegee, «Tana kaallodes koyze ooden fana kaaddo; fa masqaltto tookkii tana kaallo.

³⁵ Fa shemppito ashshodes koyze atstse dhabssoda. Yezin ta gishon Wonggele gishon fa shemppito dhabsize atstse ashshoda.

³⁶ Asi sa7alla yeze alamito tirfizako, fa shemp-pito dhabsiko eza akko maaddode?

³⁷ Asi fa shemppito wozodes akko immades dandda7e?

³⁸ Xooz ammanoose hyanna iita yeletuntsappa, fettii asi ta giddan ta qaaltten yeellidhiko, As Na7ay, mahi fa Aday bonchchora geeshi ki-itanchchuntsara ye7ize wode yeyga yeellidhoda» yagayda.

9

(Maato. 17:1-13; Luqa. 9:28-36)

¹ Yesuusa unttago, «Taanii yinttis turo ohine; Xoozze ka7itumo wolqqara yi7izanno

bi7ikaayzara hyayqqaame fettii fettii asuntsi hyanne yene» yagayda.

Yesuusa bishshita laaminttida

² Yesuusa izipun qammappa suuba, faara Phexiroosa, Yayqooban Wahannisa ekkii, untana xalaala damma derella afa kessii un tiino laaminttida.

³ E ma7itan focida; sa7alla ma7o meeccize ooden geeshshodes dandda7oose fana gaama booxxida.

⁴ Eliyaasan Musen Yesuusara ohinttoderä un bi7ida.

⁵ Phexiroosa Yesuusa, «Astamaarizayo, nuunii hyanne yezanna nuus lo77o; nu hyaydzdzii gaabba feta nees, feta Muses, mahi feta Eliyaasas gaabboda» yagayda.

⁶ Hyankkuntsi gaama tannide gisho E akko gaazakon erikaaya.

⁷ Yinnippa suuba, dhonne yi7i untana goozin dhonne garsappa, «Hyayni ta kadhize, ta Na7aya, E gaazanno si7ote» gaaze qaala yi7ida.

⁸ Ellisii untii wututsi dakkii be7ize wode Yesuusa fattin melle ooden fa kale bi7ikaaya.

⁹ Untii derizeppa wodhdhoderä, Yesuusa untago, «As Na7ay, hyayqoppa denddode wontsis, yin bi7idanno oodesin ohippete» yaga7i kiittida.

¹⁰ E kiittidanno un, «Ye7e» ga7i, «Hyanna hyayqoppa dendde gaazanna akko ga7e» ga7i, wol gidda ohinttida.

¹¹ Un mahi, «Higge asttamaaruntsi, «Eeliyaasa tiinidhii yo7odes beezane» akkos ga7e?» yaga7i oocida.

¹² Yesuusa mahi «Eeliyaasa tiinidhii yi7i, ub-babazito loytsoda; yeezin, akkos Geeshi Maxaafite, «As Na7ay gaama waayinttoda ixinttoda» yagaane ga7i oocida.

¹³ Yezin taanii yinttis ohine; Eeliyaasa yi7ida; mahi E baz Geeshi Maxaafite xaafinttidanni-gaara, asuntsi eella afa fa koydanno oochchida» yagayda.

*Yesuusa tuna ayyaana aykkide na7a fatstsida
(Maato. 17:14-21; Luqa. 9:37-43)*

¹⁴ Yesuusan, hyaydzdzuntsi tamaaruntsago maaqqii ye7ize wode gaama asuntsi un kale eqqiduntsanan higge asttamaare maaqqide eerats asuntsi untara lallizanno bi7ida.

¹⁵ Yinna gaama asuntsi Yesuusa bi7ide wode gaama qoppii, ellisii eego woxxii yi7i, eza sarot-sida.

¹⁶ Yesuusa, Xaafuntsago «Untara akko lalle?» yaga7i oocida.

¹⁷ Yentsi gaama asunts giddappa fettii atstse mahi, «Asttamaarizayo, ta na7aylla afa ohintto-danno kayze tuna ayyaana yeze gisho eza neego ekkii yi7ida.

¹⁸ Hyay tuna ayyaanze eza aykkide wode ubba, eza guuddii olane; E donttira dubba ye7ine; mahi achchi garccizane; gallitan ming-gane. Eepa hyay tuna ayyaanza kessode gaar, ne tamaaruntsis ohida, yezin kessodes un dandda7ikaaya» yagayda.

19 Yesuusa mahi unttago, «Ammanoose hyanna wode asuntso! Taanii yinttara ayde yellodes yessade? Mahi yinttana ayde yellodes dandda7ode? Na7aya taas hyanka ekkii yo7ote» yagayda.

20 Unttii na7aya eego ki7ida; ye tuna ayyaanze Yesuusa bi7ide fana na7aya goqizida; na7ay sa7a gol7i, doonara goppuntto cuttitera gol7inttida.

21 Yesuusa ye na7ay adaygo, «Hyay ne na7aya aykkidannippa wantsi wode maaqqade?» yaga7i oocida.

Na7ay aday, «E eerats yezin aykkida.

22 Eza wodhodes gaama wode taman hyaatsan olane, yezin nees dandda7inttiko, nuus yiqsint-toya, nuna maaddoya» yagayda.

23 Yesuusa eego, «*«Ne dandda7iko gaane?»* Ammanze oodesin ubba bazi dandda7inttane» yagayda.

24 Ellisii na7ay aday fa qaalto dhoqi yiizii, «Taanii ammanane, yezin gujjii ammanode gaar tana maaddoya» yagayda.

25 Yesuusa asunts gaanggi gaanggi hyanggizanno bi7i, tuna ayyaanza, «Hyay tullen muume ayyaanzayo, hyay na7ayppa kezo ga7i nena ta kiittane; mahi lam7intsa E gidda gelippe» yagayda.

26 Ye tuna ayyaanze uukki, na7aya gaama go-qizii, eepa kezida. Na7ay hyayqqide gaara yi7in, gaama asuntsi, «Na7ay hyayqqida» yagayda.

27 Yezin Yesuusa na7ay kushito aykkii dentsin, na7ay denddii eqqida.

28 Yesuusa keetsta gelidannippa suuba E tamaruntsi, «Nuunii ye tuna ayyaanza kessodes

akkos dandda7ikaaya?» yaga7i Yesuusa shaakkii dumma oocida.

²⁹ Yesuusa mahi, «Yinnii gaarize woosaran [xoomaran] fattin melle bazara kessades dandda7oos» yagayda.

Yesuusa fana yellode madhito mahi ohida

(Maato. 17:22-23; Luqa. 9:43-45)

³⁰ Unttii yinna bestippa denddii, Galilara aadhii qitida; Yesuusa fa yeze bestto ooden erode gaar koykaaya.

³¹ E fa tamaruntsago, «As Na7aya, asi asis aat-sii inggoda wodhoda; E hyaydzdzii qammappa suuba, hyayqoppa denddoda» yaga7i tamarssit-era yene.

³² Yezin untis E gaazanna gelikaaya; mahi eza oocodesin zhashtida.

Ubbappa aadhize oode?

(Maato. 18:1-5; Luqa. 9:46-48)

³³ Unttii Qifirnahome katama hyanggi keet-stsa gelidannippa suuba Yesuusa unttago, «Oge akkos lalle?» yaga7i oocida.

³⁴ Yezin un, «Nu gidda ubbappa aadhode oode?» yaga7i lallide gisho si77i gayda.

³⁵ Yesuusa bettii, taphpho lam77i tamaruntsana xegii, «Ooden tiino aadhodes koyko, ubbappa suuba aadhii, ubbuntsis aro maaqqades beezane» yagayda.

³⁶ Fettii eeratsi na7a ekkii, un gidda essida; ye eerats na7aya iringgi unttago,

³⁷ «Hyantses gaar eerats na7untsappa feta ta suntsite mukkize ooden tana mukkane; mahi

tana mukkize ooden tana kiittezayan mokkanep
attin tana xalaala mokkoos» yagayda.

Nuna ixxoose atstse nu bagga
(Luqa. 9:49-50)

³⁸ Wahannisa, «Asttamaarizayo, fettii asi ne
suntsite tuna Ayyaana kessodera nuunii bi7i, nu
bagga maaqqoosse gisho eza kayda» yagayda.

³⁹ Yezin Yesuusa, «Ooden ta suntsite Xoozii
oochchize gaama qofize baz oochchii, ellisii taalla
afa iita baz ohinttodes dandda7ize baayze gisho
kayppete.

⁴⁰ Nu baz ixxoose atstse nu bagga.

⁴¹ Taanii yinttis turo ohine; yin taasuntsana
maaqqide gisho ooden yinttis ta suntsite hyale
hyaatsi ushshades inggikon, fa anjijito ekkoda.

Nagarara fattanintte
(Maato. 18:6-9; Luqa. 17:1-2)

⁴² «Tana ammanze hyantsi eeratsuntsappa feta
balitstsize ooden, gaacize damma woxa fa afurtte
accii, Abba gidida gelizako ees lo77o.

⁴³ Ne kushita nena balitstsizako, gachchii olo.
Neenii lam77i kushera dhaboose gaanname tama
olinttodannippa, duuxutsi kushera de7o gelzako
nees lo77o.

⁴⁴ Gaanname zaqiltta hyayqoosse taman dha-
boose bessi.

⁴⁵ Ne tohita nena balitstsizako, gachchii olo.
Neenii lam77i tohera gaanname tama olinttodan-
nippa, duuxa maaqqii de7o gelizanna nees lo77o.

⁴⁶ Gaanname zaqiltta hyayqoose taman dha-boose bessi.

⁴⁷ Ne aafta nena balitstsizako, woocii kessii olo. Neenii lam77i aafera gaanname tama olinttodan-nippa, fettii aafera Xoozze ka7itumo gelizanna nees lo77o.

⁴⁸ Ize zaqilttan hyayqqoos, tamttan dhaboos.

⁴⁹ «Zharsho soogera geezhanni fana asi ubba tamara geeshshada.

⁵⁰ Sooge lo77o, yiikon E mal7anxi ixxiko, mahi wayzi mal7issade? Yin gidda sooge yesse. Yi7i fetay fetayra sarora yezote» yagayda.

10

Machcho dakkodes beezoos
(Maato. 19:1-2; Luqa. 16:18)

¹ Yesuusa yinnippa denddii, Yihuda sa7a hyanggi Yorddaanosa borkka fiinggida. Gaama asuntsi mahi eego shiiqin, tiinosttifana yentsi asuntsana tamarssida.

² Fettii fettii Farisaawuntsi fattanodes koyi Yesuusa, «Fettii asi fa machchito dakkode gaar Muse higgita kiittane?» yaga7i eza oocida.

³ E mahi, «Muse yinttana waaga7i kiittido?» yagayda.

⁴ Unttii, «Muse, «Fettii asi fa machchitis dafo warqqate inggi dakko» gayda» yagayda.

⁵ Yesuusa mahi, untana «Yin ohin si7oosuntsana maaqqide gisho Muse hyanna kiitto yinttis xaafida.

⁶ Yezin Xoozii tiino medhhdhize wode dhiiratsin maachon mahi medhhdhida.

⁷ Yinnii gisho, fettii asi fa adayan fa intton ashshii, fa machchitira wolla yezane.

⁸ Un lam77untsi fettii asho maaqqane; yikkeppa, un fettii asho maaqqanep attin lam77i asi maaqqoos.

⁹ Yinnii gisho, Xoozii accidanno asi shagippe» yagayda.

¹⁰ Un kara maaqqide wode E taaarunsi hyanna ohiti baz Yesuusa lam7intsa oocida.

¹¹ Yesuusa unttago, «Fa machchito dakkii melle ekkize ooden olalane.

¹² Mahi machchitan fa azinzeppa kezii melle azinii geliko olalida» yagayda.

*Yesuusa eerats na7untsana anjjida
(Maato. 19:13-15; Luqa. 18:15-17)*

¹³ Yesuusa eerats na7untsana bochchode fana, fettii fettii asunts na7untsana eego ki7ida, yezin E taaarunsi yentsi asuntsana kaccida.

¹⁴ Yesuusa yinno bi7i, fa taaaruntsana kaccii; unttago, «Eerats na7untsi taago yi7izanno kayppete; Xoozze ka7itumo yentses gaarzuntsis.

¹⁵ Taanii yinttis turo ohine; Xoozze ka7itumo eerats na7a fana ekkoosse atstse ooden yinna ka7itumtto mulon geloos» yagayda.

¹⁶ Eerats na7untsana iringgi, fa kushito fetella fetella afa gaddii anjjida.

*Qolo yiqsimo ki7ize madha
(Maato. 19:16-30; Luqa. 18:18-30)*

17 Yesuusa qitodes kezide wode fettii atstse woxxi yi7i, E tiintte bunqqunttii, «Keeha astta-maarzayo, medhina de7o laattodes taanii akko oochcho?» yaga7i oocida.

18 Yesuusa, «Akkos tana keehizayo ga7i xeege? Xoozze xalaalap attin melle kee ha ooden baaya.

19 Xoozze kiitto, wodhippe; olalippe; kaystippe; worddo markkidhippe; il7antsite laammippe; ne adayan ne intto bonchcho yagaazanno erane» yagayda.

20 Atstse, «Astaatamaarizayo, taanii yinno ubba na7atitsappa aykkii hyayno yellodes naagane» yagayda.

21 Yesuusa attsa dakkii bi7i kadhida; «Nees fettii bazi faccane; hyanggi nees yeze baz mulo bayzi, yinna birtto dahuntsis inggo; neenii salo duridhdhada. Yeyzi maaqqii tana kaallo» yagayda.

22 Yezin atstse yinno si7i, E gaama dure maaqqide gisho fa sintto kartsii, ufayttikaayzara ashshii qitida.

23 Yesuusa fa tamaaruntsana wututsii dakkii bi7i, «Dure asi Xoozze ka7itumo gelodanna wayzi madhodyessa!» yagayda.

24 E tamaaruntsi E timirttite gaama qoppida. Yezin Yesuusa mahi unttago, «Na7untso, Xoozze ka7itumo gelodanna wayzi madhodyessa!

25 Dure asi Xoozze ka7itumo gelodannippa, gimale marppe uruntsara aadhizanna laafane» yagayda.

²⁶ E tamarunsi gaama qoppii, «Yeezin, oode attode?» yaga7i, fete feta oocida.

²⁷ Yesuusa untana dakki bi7i, «Hyanna Xoozses dandda7inttanep attin asis dandda7inttoos; Xoozses ubba bazi dandda7inttane» yagayda.

²⁸ Phexiroosa Yesuusago, «Ero; nuunii nu baz ubba ashshii, nena kaallane» yagayda.

²⁹ Yesuusa «Taani yinttis turo ohine; ta gishon Wonggele gishon keetsito woy ishuntsana woy mishuntsana woy adaya woy intto woy machchito woy na7untsana woy oochchize gadito ashshize ooden,

³⁰ hyatte hyanna wodite xeet kushe keetsito, ishuntsana, mishito, intto, na7untsana, oochchize gadito, bayttsara wolla ekkoda. Tiinoppa ye7ode woden medhina de7o ekkoda.

³¹ Yezin gaamunsi tiino maaqqidunsi suub maaqqada, mahi gaamunsi hyatte suub maaqqidunsi tiino maaqqada» yagayda.

Yesuusa fana yellode madhito hyaydzdzintsa ohida

(Maato. 20:17-19; Luqa. 18:31-34)

³² Yesuusaran E tamaruntsara Yerusalaame hyammadera, Yesuusa fa tamarunts tiintte yedhdhane. Un gaama qoppida. Eza kaal-lizuntsin zhashtida. Lam7intsa, taphpho lam77i tamaruntsana gaxa kessii, fana yellode baz shagii unttago hyannigaara yaga7i ohida.

³³ «Hyaychche, nuunii Yerusalaame hyatte kezane. Ize As Na7ay, kahinunts hyalaquntsisin higge asttamaruntsis aatsii ingginttoda. Unttii

eella afa hyayqo firdda firddoda; mahi Ayhude maaqqoosse asuntsis eza aatsii inggoda.

³⁴ Ye Ayhude maaqqoosse asuntsi eza leqqoda, eella afa cuttoda, allanggara garaafoda wodhoda. E hyaydzdzii qammappa suuba, hyayqoppa denddoda» yagayda.

*Yayqooban Wahannisa woosside woosa
(Maato. 20:20-28)*

³⁵ Zabdoosa na7unts Yayqooban Wahannisa Yesuusago yi7i, «Astamaarizayo, nuunii nena woossiz fettibaz nuus oochchoya» yagayda.

³⁶ Yesuusa unttago, «Taanii yinttis akko oochcho?» yagayda.

³⁷ Unttii, «Neenii ne bonchcho ka7itumtte bettize wode nuuppa feta mizaqi zalara mahi feta workkita zalara betitsoya» yagayda.

³⁸ Yezin Yesuusa unttago, «Yinttii akko woossizako eroos, ta ushshades yeze xuu7a ushshades dandda7odate? Mahi taanii xammaqinttodes yeze xinqqatto xammaqinttodes dandda7odate?» yagayda.

³⁹ Un mahi, «Ye dandda7oda» yagayda.

Yesuusa mahi, «Turo ta ushshades yeze xuu7a yin ushshada, taanii xammaqinttodes yeze xinqqatto yin xammaqinttoda.

⁴⁰ Yezin taappa mizaqi zalaran workkita zalara bettoduntsana doorodes taas adetits wolqqa baaya, yezin yinna bessita Xoozii immades gigizii gaddiduntsis» yagayda.

⁴¹ Attiduntsi taphphi tamaruntsi yinno si7ide wode Yayqooballan Wahannisalla shenidhdhida.

⁴² Yesuusa untana ubba faago xeezii, «Ayhude maaqqin Ayhude maaqqoosse asunts hyalaquntsi worzha ahizuntsana ga7intti xeeqinttizuntsanan ahizuntsis worzhuntsalla afa adetits wolqqa yezanno yin erane.

⁴³ Yezin yin gidda yinnii fana maaqqades beezos; yin gidda damma maaqqades koyze ooden yinttis aro maaqqades beezane.

⁴⁴ Mahi yin gidda ubbappa aatsii maaqqades koyze ooden yin ubbuntsis aro maaqqades beezane.

⁴⁵ Melle atto yezin, As Na7ayin, as maaddodesin gaamuntsana ashshodes fa shemppito aatsii immades yi7idap attin asi ees oochchode gaar yi7ikaaya» yagayda.

*Yesuusa qooqe Barxxemoosa aafto fatstsida
(Maato. 20:29-34; Luqa. 18:35-43)*

⁴⁶ Unttii Iyaarkko katama hyanggida. Yesuusa fa tamaruntsaran gaama asara Iyaarkkoppa kessadera, Ximoosa na7a, qooqize, Barxximoosa ga7inttize, oge gaxa woossittera bettida.

⁴⁷ Barxximoosa, yeygara aadhize Naazirete Yesuusa maaqqidanno si7ide wode fa qaaltto dhoqi yizii, «Dawute na7a Yesuusa, tana maaroya!» yaga7e aykkida.

⁴⁸ Gaama asuntsi eza, «si7i ga7o!» ga7i kaccida. Yezin, E fa qaaltto kasennippa gaama dhoqi yizii, «Dawute na7ayo, tana maaroya!» yagayda.

⁴⁹ Yesuusa eqqii, «Eza hyankka xeeqote» yagayda.

Unttii qooqizego, «Akko baaya, denddii eqqo, nena xeeqane» yagayda.

⁵⁰ Qooqize fa ma7ito olii ashshii, doollii denddii eqqii, Yesuusago hyanggida.

⁵¹ Yesuusa, «Taanii nees akko oochchode gaar koye?» yagayda.

Qooqize, «Astattamaarizayo, ta be7ades koyane» yagayda.

⁵² Yesuusa eego, «Qito, ne ammantta nena fatstsida» yagayda. Iira E aafata bi7in, Yesuusa kaallida.

11

Yesuusa damma bonchchora Yerusalaame gelida

(*Maato. 21:1-11; Luqa. 19:28-40; Waha. 12:12-19*)

¹ Un Yerusalaame ukkitera, Shamahe Derize kale yeze Beetefaagen Bitaaniiya katamito yellida. Yesuusa fa tamaruntsappa lam77untsana tiino dakkii,

² «Yinttappa tiino yeze kara gancce qitote; ize gelide gaar ooden toggii bi7ikaayze acinttii yeze hyare na7a yin denggoda, eza billii, hyayga ekkii yo7ote.

³ Ooden yinttana, «Hyanno akkos oochche?» yaga7i oociko, «Laatstsii eza koyane, ellisii eza hyankka dakkoda» ga7ote» yagayda.

⁴ Un hyanggi, hyare na7aya bale oge kale acinttii yezaya denggi billida.

⁵ Yinna besite eqqide fettii fettii asunts unttago, «Hyare na7aya wayssades bille?» yagayda.

⁶ E tamarunsi Yesuusa fana kiittezanno ohin, asunts ashshii ashshida.

⁷ Unttii hyare na7aya Yesuusago ki7i, fa ma7ito E bantte yiixxin Yesuusa ye hyare na7aya toggida.

⁸ Gaama asuntsi fa ma7ito ogite yiixxida; mahi melluntsi minxa tashe shaqqii, ogite yiixxida.

⁹ Yesuusappa tiino yedhdhize asuntsin eza kaallize asuntsi fa qaaltto dhoqi yiizii,

«Hosaana!*

Laatstse suntsite ye7ize anjjinttidaya.

¹⁰ Ye7ize nu aday Dawute ka7itumtta anjjinttidanno.

Hosaana! Salo»
yagayda.

¹¹ Yesuusa Yerusalaame hyanggi, Xoozze Keetsta gelida. Mahi ubbabazito wutii bi7idannippa suuba, sa7ita qammize gisho taphpho lam77i tamaruntsara Bitaniya katama qitida.

Yesuusa baaddide belese minxito
(Maato. 21:18-19)

¹² Wonttisti wode un Bitaniyappa kezii hyam-madera, Yesuusa nayzida.

¹³ Hyaakora fettii belese minxitis zhil7o hyaye yezanno bi7i, lilla afa aafe benttiko ga7i, be7ades izigo hyanggida, yezin izigo E hyanggize wode hyaye xalaalap attin fettii aafen denggikaaya; akkos gayko, belese aafze wode yellikaayze gisho.

¹⁴ Yesuusa yinna belesito, «Yikke, neppa asi aafe miippe» yagayda. E tamarunsi E gaazanno si7ida.

* **11:9 Hosaana:** Maato 21:9 bo7ote. **11:9 Maz.** 118:25

Yesuusa Xoozze Keetsta zal7izuntsana kessida
(Maato. 21:12-17; Luqa. 19:45-48; Waha. 2:13-22)

¹⁵ Un Yerusalaame qitida; Yesuusa Xooze Keetsta gelii, ize bayzizuntsanan wonggizuntsana bale bay7e aykkida; mahi bira laammizuntsana xarphezan wolle bayzizuntsana oyda dakkii olii,

¹⁶ asi akko bazin tookkii, Xoozze Keetsta gid-dara aadhaame fana kayda.

¹⁷ Yesuusa asuntsana hyannigaara yaga7i tamarssida: «Geeshi Maxaafite, <Ta keetsita asi ubba Xooz woossiz keetsti maaqqada> ga7intti xaafinttida. Yezin yinttii izo faanno aachinttize wom7o mahida» yagayda.

¹⁸ Kahinunts hyalaquntsin higge astta-maaruntsi yinno si7i, eza wodhodes oge koye aykkida. Yezin gaama asuntsi E timirttite gaama qoppize gisho ees zhashtida.

¹⁹ Sa7ita ugurize wode Yesuusan E tamaruntsin katamappa gaxa kezida.

Belese minxita melida
(Maato. 21:20-22)

²⁰ Un wonttistti wode yinna ogitira aadhitera, yinna belesta xaphora melidaanno bi7ida.

²¹ Phexiroosa tiirii, «Asttaamarizayo, yikke, neenii baaddide belesita melida» yagayda.

²² Yesuusa mahi, «Xoozza ammanote.

²³ Taanii yinttis turo ohine; ooden fa wozintte so7ikaayzara gaydebazi hyanodanno ammanii, hyay deriza, <Denddii Abba wodhdho> yagayko ees hyanoda.

²⁴ Yinnii gisho, taanii yinttis ohine; Xoozza yin woossiz bazin oocizebaz akko maaqqikon ekkide gaara ammanote, yin ekkoda.

²⁵ Xooz woossodes yin eqqize wode salo yeze yin Aday yin nagartto atto gawude fana, ooden yinttana naaqqidebaz yeziko, ees atto ga7ote.

²⁶ [Yezin as nagara yin atto ga7anxi ixkiko, salo yeze yin Adayn yin nagartto yinttis atto ga7oos» yagayda].

Yesuusa akko adetits wolqqara oochchizako oocinttida

(Maato. 21:23-27; Luqa. 20:1-8)

²⁷ Un mahi Yerusalaame hyanggida. Yesuusa Xoozze Keetsta hyanttodera, kahinunts hyalaquntsi, higge asttamaaruntsin cimuntsi eego yi7i,

²⁸ «Neenii hyanno oochchodes nees akko adetits wolqqa yeze? Woy nees hyanna adetits wolqqito inggide oode?» yagayda.

²⁹ Yesuusa mahi unttago, «Ta yinttana fettibaz oocoda, taas ohote. Ta mahi hyanno akko adetits wolqqara oochchizako, yinttis ohoda.

³⁰ Wahannisa xinqqata Xoozappane woy asappa? Taas ohote» yagayda.

³¹ Unttii fa gidida lalle aykkii, «Nuunii, <Xoozappa> gayko, E nuugo, <Yeezin, Wahannisa ohizanno akkos ammananxido?» yagawuda.

³² <Asappa gayko> asi ubba Wahannisa nabe maaqqizanno erane.» Maaqqide gisho asuntsis zhashtida.

³³ Yinnii gisho, unttii Yesuusago, «Nuunii eroos» yaga7i mahida;

Yesuusa, «Taanin hyanno akko adetits wolqqara oochchizako, yinttis ohoos» yagayda.

12

*Woyne tukkii oochchizunts aazize
(Maato. 21:33-46; Luqa. 20:9-19)*

¹ Yesuusa unttis aazizera yaga7i ohida; «Fettii atstse woyne atakiltte tukkii, gaxito wututsii gase gasida. Mahi ye woyniza cicize ollan bookkida. Eza kafodes pharggo shakko shakkida. Yinnippa suuba, kotstse oochchize asuntsis inggi, melle sa7a qitida.

² Woyne aafta diilii maxize wode yellin, fana yellizanno ekkii ye7ode gaar, fettii fa ariza kotstse aduntsago kiittida. ³ Kotstse ekkide asuntsi E ariza aykkii hyadhdhii, hyarii kushe dakkida.

⁴ Lam7intsa melle aro untago kiittin, un ye arizes ommito shuchchara qawuxii kawushizii dakkida.

⁵ Woyne taakilte laatstsay mahin melle aro kiittida. Ye ariza wodhida, mahi melle gaamuntsana yinnii gaara yeyzida, feta feta hyadhdhii, mel-luntsana wodhida.

⁶ «Woyne atakiltte laatstses kiittodes ubbappa lasite E gaama kadhize fa na7aya dakkodanna xalaala attida. E, «Un ta na7aya bonchchikaayzara ashshaama» ga7i, fa na7aya untago kiittida.

⁷ «Yezin kotstse aduntsi fa gidida, «Laattoday hyaya; yedhdhote eza wolla wodhoda; E laatita nuus maaqqada!» yagayda.

⁸ Na7aya aykkii wodhii, E ahito woyne atakiltte giddappa gaxa kessii olida.

⁹ «Yikke, woyne atakiltte laatstsay wayssade? Yi7i yentsi kotstse aduntsana wodhii hyaasii, woyne kotstse oochchize melle asis inggoda.

¹⁰⁻¹¹ «‹Keexizuntsi leqqii ixside shuchchize Keetsiti mayzentto xaalize, ubbappa aadhize mintsi shuchchi maaqqida. Hyanno Laatstsii oochchidebaz; mahi nu aaftisin gaama qofize baz yagaazanno Geeshi Maxaafepa nabbabika?› » yagayda.

¹² Kahinunts hyalaquntsi, higge astta-maaruntsin cimuntsi Yesuusa yinna aazizito untalla afa ohidanno eride gisho eza aykkodes koyda, yezin asuntsis zhashtii, ashshii qitida.

*Giira giirize bazis shiiqide ooce
(Maato. 22:15-22; Luqa. 20:20-26)*

¹³ Mahi yinna ohitippa bala denggi, eza aykkode gaar, Farisaawuntsappa Heroodisa bag-guntsappa eerats asuntsana eego kiittida.

¹⁴ Unttii eego yi7i, «Asttaaarizayo, neenii turibaz ohinttizanno asappa as shaakkoosanno nuunii erane. Neenii as shaakkoos; mahi Xoozze ogito turetitsara tamarssane. Nuunii Roome gade Kaat Qeesares giira giirizanna likken likke baa? Giira giironene ashshone?» yagayda.

¹⁵ Yezin un cubbotitsito Yesuusa erii, «Tana akkos fattane? Ane fettii santime tana beezote» yagayda.

¹⁶ Unttii ees ki7ida, «Hyanna bishshitan suntsita oodeso?» yaga7i untana oocida.

Unttii, «Qeesares*» yagayda.

¹⁷ Yesuusa mahi, «Yeezako, Qeesarestto Qeesares, Xoozzesito Xoozis inggote» yaga7in un E baz gaama qoppida.

Hyayqoppa denddebaz

(Maato. 22:23-33; Luqa. 20:27-40)

¹⁸ Hyayqqide asi denddoos gaaze Saduqaawuntsappa fettii fettii asuntsi Yesuusago yi7i, hyannigaara yaga7i, eza oocida.

¹⁹ «Asttaamarizayo, Muse nuus higge xaafittera, «Machcho ekkide asi na7a yelikaayzara hyayqqiko, ye hyayqqide ishe E machchito ekkii, fa ishes na7a yelodes beezane» yagaazanno xaafida.

²⁰ Zaga wode laappun ishuntsi yezuntsappa anggisse machcho ekkii, na7a yelikaayzara hyayqqida.

²¹ Lam7antsize izo ekkida, ezin na7a yelikaayzara hyayqqida. Hyaydzantsize yinnii gaar yi7ida.

²² Laappununtsin yinnii gaara izo ekkii, na7a yelikaayzara hyayqqida. Ubbappa suuba, mahi yinna maachita hyayqqida.

²³ Yeezin, laappununtsi mulo izo ekkide gisho hyayqqide asuntsi hyayqoppa denddide wode, iza untappa aayyes machcho maaqqade?» yagayda.

* **12:16** Qeesare-Roome kaat **12:18** Hawa. 23:8 **12:19** Mahe 25:5

24 Yesuusa mahi, «Yinttii balinttizanna, Geeshi Maxaafito woy Xoozze wolqqa erikaayze gisho!

25 Hyayqqide asuntsi hyayqoppa denddide wode, salo yeze kiitanchcho maaqqanep attin dhiiratsin ekkoos; maachan geloos.

26 Yezin hyayqqiduntsi denddebaz maaqqiko, Muse maxaafite xaafinttide eexize hyaburtutibaz ohize besite, Xoozii Musego, «Taani, Abrahama Xoozii, Yisaaqa Xoozii, Yayqooba Xoozii» gay-danno nabbabikate?

27 Yinnii gisho, E, shemppora yezunts Xoozap attin hyayqqiduntsi Xoozii baaya. Yin gaama balida» yagayda.

Ubbappa aadhize kiita

(Maato. 22:34-40; Luqa. 10:25-28)

28 Higge asttamaaruntsappa fete un lallizanno shiiqii si7ida. Mahi Yesuusa untis loytsii mahi-danno si7i, «Kiita ubbappa aadhize kiitta aanno?» yaga7i Yesuusa oocida.

29 Yesuusa mahi, eego hyannigaara yagayda: «Kiita ubbappa aadhize kiita si7ote; «Isra7eele asuntso, Laatstse nu Xoozze fettii Laatstsii.

30 Ne Laatsta ne Xoozza ne kumutsi woz-inappa, ne kumutsi shemppoppa, ne kumutsi qofappa, ne kumutsi wolqqappa kadho» yagayda.

31 Mahi kiita ubbappa aadhize lam7intsa ki-itize; «As ubba ne ommiti gaar kadho» ya-gaazanno; hyantsesappa aadhize melle kiita baaya» yagayda.

³² Higge asttamaarize Yesuusago, «Asttamaarzayo, turo gayda; neenii <Xoozii fettii Xoozii xalaala. Eeppa melle baaya> gaydanna turo.

³³ Xoozza kumutsi wozinappa, kumutsi qo-fappa kumutsi wolqqappa kadhizannon mahi as ubba fa ommi gaar kadhizanna, michchize zharshoppa melle zharsho ubbappa aadhane» yagayda.

³⁴ Yesuusa higge asttamaarize mahidanna aadhize era as mahe maaqqidanno bi7i, «Neenii Xoozze ka7itumoppa hyaakkikaaya» yagayda; yinnippa suuba, Yesuusa mellebaz oocodes ooden miinggikaaya.

Kiristtoosa oode na7a

(Maato. 22:41-46; Luqa. 20:41-46)

³⁵ Yesuusa Xoozze Keetsta tamarssite, hyan-nigaara yagayda: «Higge asttamaarunsi Kiristtoosa <wayzi Dawute na7a ga7e?»

³⁶ Dawute Geeshi Ayyaanara kaallii,
« <Laatstsii, ta Laatstsaya, «Taanii ne morkkuntsana ne tohita yedhdhize bessi mahode wontsis, hyanne taappa mizaqi zala betto» gayda» yagayda.

³⁷ Dawute fa ommite Kiristtoosa, <Laatstso> ga7i xeeigiko, yeezin, Kiristtoosa wayzi, Dawute na7a maaqqe» yagayda.

Gaama asunsi Yesuusa gaazanno ufaytti si7ida.

*Yesuusa higge asttamaaruntsanan
Farisaawuntsana leqqida*

(Maato. 23:1-36; Luqa. 20:45-47)

³⁸ Yesuusa tamarssitera, hyannigaara yagayda: «Higge asttamaaruntsappa naaginttote; un pharggo ma7o ma77i wutizannon gaben asi untana bonchchii sarotsizanno koyane.

³⁹ Unttii Ayhude woosa keetsta gaama lo77o oyda koyane; mahi asi fana mukkize bessa bonchcho bessi koyane.

⁴⁰ Un budan keetsti bonqii, fana beessades pharggizii woossane; un ubbappa aadhize firdda ekkoda» yagayda.

*Budantti muxaate
(Luqa. 21:1-4)*

⁴¹ Yesuusa Xoozze Keetsta muxaate olize saaxine kale bettii, asuntsi fa birtto yinna saaxintte olizanno bi7ida; gaama dure asuntsi gaama bira yinna saaxintte olane.

⁴² Fettii daha budantta yi7i, lam77i sikkinna yinna saaxintte olida.

⁴³ Yesuusa fa tamaruntsana xeezii, «Taanii yinttis turo ohine; muxaate saaxintte olide asunts ubbappa hyanna daha budantta gaantsi olida.

⁴⁴ Akkos gayko, melluntsi ubba faas kumii attide birappa olane. Yezin iza fa facitippa, faas yeze qoltto ubba inggida» yagayda.

13

*Yesuusa Xoozze Keetsita wul7inttodanno tiinii
ohida*

(Maato. 24:1-2; Luqa. 21:5-6)

¹ Yesuusa Xoozze keetstsappa kessadera, E tamaaruntsappa fete, «Asttamaarizayo, hyanna lo77o shuchchiton hyanna lo77o shuchchi keetsito be7ine!» yagayda.

² Yesuusa mahi, «Hyanna damma shuchchi keetsito be7ine? Hyanna keetsita shuchchi shuchchalla afa gimbbinttide fana wul7inttikaayzara attoos; fettii shuchchin attikaayzara ubba wul7inttoda» yagayda.

Laatstsii yo7odannippa tiino yellode baytstsini madha

(Maato. 24:3-14; Luqa. 21:7-19)

³ Yesuusa Xoozze keetstsappa seko zalara Shamahe Derizella afa bettezin, Phexiroosa, Yayqooba, Wahannisan Inddiriyase eego yi7i,

⁴ «Hyanna ayde yi7adyezako, nuus oho; hyanna ubba folinttodes wodito erisize mallita akko?» yaga7i oocida.

⁵ Yesuusa mahi unttago hyannigaara yaga7i ohida: «Yinttana ooden balitsaame fana naaginttote.

⁶ Gaama asuntsi ta suntsite, «Taanii Kiristtoosa» ga7i gaama asuntsana balitstsoda.

⁷ Olan ola wore si7ize wode yirggippete. Yin-nii gaarize hyanodes beezane, yezin wurssutsita hyaga.

⁸ Fettii gade asuntsi melle gade asuntsara olinttoda; mahi fettii ka7itumo melle ka7itumora olinttoda; sa7a eni7e ubba bessa hyanoda; naye yessada, yezin yinna ubbanna yelo zooqe fana.

⁹ «Yezin yinttii, yin ommite naaginttote. Akkos gayko, asi yinttana aykkii, firdda keetstsis aatsii

inggoda; mahi Ayhude woosa Keetstsiten yintana alanggara garaafoda; gade ahizuntsii tiinon kaatuntsi tiino ta gisho yin markkidhades eqqoda.

¹⁰ Wurssutsita yellodannippa tiino Wonggele asi ubbas ohinttodes beezane.

¹¹ Unttii yinttana firda keetsta ki7ize woden aatsii inggize wode waagii ohodyezako tiino yirgippete; yinna saate Xoozii yinttis inggide baz ohote. Yin gidda Geeshi Ayyaana ohinep attin yinttana baaya.

¹² «Ishe fa isha, aday fa na7aya wodhissada. Na7untsi fana yeliduntsalla denddii, untana wodhoda.

¹³ Asi ubba yinttana ta suntsiti gisho ixroda, yezin wurssutsi yellodes miinggide attoda.

Yerusalaame yellode iita madha
(Maato. 24:15-28; Luqa. 21:20-24)

¹⁴ «Yezin dhabsize tunize eqqodes beezoosse bessa eqqezin yin be7ada.» Yinna akko ga7inttizako nabbabize akaako! «Yihuda sa7a ye wode yezuntsi derego woxxi aachintto.

¹⁵ Bale yeze keetsta gelii keetstsappa fettibaz ekkodes gode, fa keetsta gelippe.

¹⁶ Gade yeze fa ma7ito ekkodes suuba maaqqippe.

¹⁷ Ye wode wodatsi maachuntsisin dhantsize maachuntsis gaama madha maaqqada.

¹⁸ Yezin hyanna ubba hyanize wodita seete maaqqaame gaar, Xooz woossote.

¹⁹ Akkos gayko, Xoozii alamito medhdhhide woditippa aykkii, hyayno yellodes hyanikaayze madhan tiinosin hyanoosse kille madha asalla afa ye wode hyanoda.

²⁰ Laatstsii yinna qammiti faydito eeritsikaayzako, asi maaqqide ooden attoos. Yezin E fa dooride asunts gisho yinna faydito eeritsane.

²¹ «Ye wode ooden yinttana, «Yikke, Kiristtoosa hyanne yene woy Kiristtoosa sekka yene» ya-gayko, yinno ammanippete.

²² Worddo Kiristtoosan worddo nabuntsi dend-dii faas dandda7inttiko, melle atto yezin Xoozii dooriduntsappa balitsode wontsis kille bazin gaama qofize baz beessada.

²³ Yezin yinttii naaginttote, taanii yinttis ubba baz tiinidhii ohida.

Kiristtoosa lam7intsa ye7e

(Maato. 24:29-31; Luqa. 21:25-28)

²⁴ «Yezin ye wode yinna madhitippa suuba,
«Awa dhumoda;

agina foo7ito ashshoda;

²⁵ Xoolinttuntsi saloppa gol7oda;

mahi salo yeze wolqqitan en7oda.

²⁶ Ye wode As Na7ay, damma wolqqaran bonch-chora dhonne giddara ye7odera un be7ada.

²⁷ Ye wode E kiitanchchuntsana kiittoda. Oyddii zala sa7a gaxappa salo gaxa yellodes, Xoozze dooride asuntsana shiishoda.

Wode yellidanno erisize belese minxito
(Maato. 24:32-35; Luqa. 21:29-33)

²⁸ «Aaziztto belese minxappa tirote; belesata aacize wode I hyayta cil7e aykkide wode torchche yellidanno yin erane.

²⁹ Yinnii gaar, yinttii yinna ubba bazita hyanizanno be7ize wode ukkii furtsa yellidanno erote.

³⁰ Taanii yinttis turo ohine; hyanna ubba bazita hyanode wontsis hyanne yeze asuntsi ubba hyayqqoos.

³¹ Salon sa7an aadhoda, yezin ta qaalta mulon aadhoos.

Laatstsii ye7ode qammiton saatto ooden eroos
(Maato. 24:36-44)

³² «Yezin yinna qammiton yinna saatto Aday xalaalap attin melle atto yezin salo yeze kiitanchchuntsana maaqqikon woy Na7aya maaqqikon ooden erize baaya.

³³ Yinna wodita ayde maaqqizako, yin eroosse gisho naaginttoten minggote.

³⁴ Ta ye7ita fa keetsito ashshii, oge qitide atstse gaara. Attsay fa aruntsis ommar ommar oocha inggi untana oochitis ade mahida; mahi naagizen mintstsii naagode gaar kiittida.

³⁵ «Yinnii gisho, minggote. Akkos gayko, karttii aday uigure maaqqiko woy qamma bilahe maaqqin woy Lukule oollize wode maaqqin woy wontta gooda maaqqin ayde ye7ode yezako, yin eroos.

³⁶ Yin tiirikaayzin E yi7i yinttana gentto yezin denggaame gaar minggote.

³⁷ Taanii yinttis ohizanno asi ubbuntsis ohine; minggote» yagayda.

14

Kiristtoosalla afa maaqqinttida

(Maato. 26:1-5; Luqa. 22:1-2; Waha. 11:45-53)

¹ Faasiga Ba7aale bonchchize qamman boora Ba7ale bonchchize qamma yellodes lam77i qamma attida. Kahinunts hyalaquntsin higge asttamaaruntsi asi erikaayzin Yesuusa genii ekkii wodhodes oge koyane.

² «Asuntsi kachchi kessaame fana Faasiga bonchchize qammite yinno oochchoos» yagayda.

Yesuusa shitto tizhide maachito

(Maato. 26:6-13; Waha. 12:1-8)

³ Yesuusa Bitaniya katamite qursumara hyargginttide Simoona keetsta munttalla afa bettezin, fettii maachita albasxiroose bilqqaaxe kumutsi narddoosa gaaze gaama al77o shitto ekkii yi7ida. Ye bilqqaaxiza mentsii shitto Yesuusa ommite gussida. ⁴ Yinna besite yeze asuntsappa fete fete zhilidhdhii, «Hyay shittiza cer hyarii lalizanna akkoso?

⁵ Hyay shittiza hyaydzdzii xeet dinaares* bayzi, birtto dahuntsis immades dandda7inttane» yaga7i fa gidda ohinttida. Yeyzi, yinna maachito gaama leqqida.

⁶ Yezin Yesuusa «Hyanna maachito akkon ga7ippete; izo akkos waytsete? Iza taas lo77o baz oochchida.

14:1 Keze 12:1 **14:3** Luqa. 7:37 * **14:5 Dinaar:** Fettii asis fettii qamma oochas ciginttize miishe.

⁷ Dahuntsi ubba wode yinttara yene. Yin koyeze wode ayden yin untana maaddodes dandda7ane, yezin taanii ubba wode yinttara yezoos.

⁸ Iza fa dandda7idanno oochchida; mahi tana mooges giigisades tiinidhdhii shitto tizhida.

⁹ Taanii yinttis turo ohine; sa7a ubbanne Wonggele ohinttize aban, asuntsi izo tiirode fana hyanna iza oochchidanna ohinttoda» yagayda.

*Yihuda Yesuusa aatsii immades zorinttida
(Maato. 26:14-16; Luqa. 22:3-6)*

¹⁰ Taphpho lam77i tamaaruntsappa fete Asqorootu Yihuda ga7inttize Yesuusa kahinunts hyalaqunts is aatsii immades unttago hyanggida.

¹¹ Unttii yinno si7eze wode ufaytti, «Nuunii nees bira inggoda» yagayda; Yihuda Yesuusa aatsii immades wottize wode koyane.

*Yesuusa fa tamaruntsara Faasiga mu7ida
(Maato. 26:17-25; Luqa. 22:7-14, 21-23; Waha. 13:21-30)*

¹² Boora Ba7aale bonchchinttize tiino qamma, Faasiga kattsa ma7ades mara shukkize wode Yesuusa tamaruntsi eego, «Faasiga bonchchize qamma ne ma7ade kattsa nu aba hyanggi gi-igisade?» ga7i oocida.

¹³ Yesuusa fa tamaruntsappa lam77untsana hyannii gaara yaga7i kiittida: «Katama qitote; yin hyammadera, xuggara hayaatsi tookkii fettii atstse yinttara yellinttoda; eza kaallote.

¹⁴ E hyanggi gelize karttii adego, «Asttaamarize neego, «Taani ta tamaruntsara Faasiga ma7ades zaqqo keetstsita aba yene?» gayda yaga7ote.

¹⁵ Karttii adday yinttana fooqella yeze giigii bettide dalga kifile beessada; yeyga giigizote» yagayda.

¹⁶ Yentsi tamaruntsi kezii, katama hyanggida; Yesuusa unttago ohidanni gaara denggi, Faasiga kattsa giigizida.

¹⁷ Saata ugurize wode Yesuusa taphpho lam77i tamaruntsara yeyga hyanggida.

¹⁸ Unttii bettii kattsa ma7adera, Yesuusa unttago, «Taani yinttis turo ohine; yinttappa fete taara mu7ize, tana aatsii inggoda» yagayda.

¹⁹ E tamaruntsi azzanii, fa ommite ommite, «Turo tana yessane?» yaga7i eza oocida.

²⁰ Yesuusa mahi, «Ye atstse yin taphpho lam77untsappa feta; E taara fettilla fa kushito gabate dakkizaya.

²¹ As Na7ay, Geeshi Maxaafite hyayqqoda ga7idanni gaara hyayqqoda, yezin As Na7aya, aatsii inggize attsa bade. Ye atstse yelintikaayzar attezako ees lo77o yeshsha» yagayda.

Laatstse kawo

(Maato. 26:26-30; Luqa. 22:14-20; 1 Qoro. 11:23-25)

²² Unttii ma7adera, Yesuusa boora ekkii, Xooz galatida; ye booriza baxxi, fa tamaruntsis inggitera, «Hya7ate, hyanna ta ashito» yagayda.

²³ Xuu7a ekkii, Xooz galatii, unttis inggin ubbuntsin ye xuu7izeppa uzhida.

²⁴ Yesuusa, «Hyanna gaama asuntsi gisho gog-gize caaqo suutsi.

²⁵ Taanii yinttis turo ohine; ta Xoozze ka7itumtte kille woyné ushshade qammita yellodes mahi hyay woynizeppa uzhoos» yagayda.

²⁶ Mazmure yexxidannippa suuba Shamahe Derizella afa kezida.

Phexiroosa kaddodanno Yesuusa tiinidhii ohida

(Maato. 26:31-35; Luqa. 22:31-34; Waha. 13:36-38)

²⁷ Yesuusa unttago, «Yin ubba tana ashshii ashshii lalinttoda;» Xaafinttidanni fana, «Xoozze duro yenggizaya wodhoda, duruntsi ubbanna lalinttoda» yagayda.

²⁸ Yezin taanii hyayqoppa denddidannippa suuba yinttappa tiinidhii Galila aadhoda» yagayda.

²⁹ Phexiroosa mahi, «Unttii ubbuntsi nena ashshii ashshii dhabikon, ta nena ashshoos» yagayda.

³⁰ Yesuusa Phexiroosago, «Taanii nees turo ohine; hyayno qamma lukule lam77i tohe oollo-dannippa tiino ne tana hyaydzdzii tohe kaddoda» yagayda.

³¹ Yezin Phexiroosa kasennippa mintstsii, «Taanii melle atto yezin, neera wolla hyayqqizakon, nena kaddoos» yagayda. Mahi melluntsi ubbuntsi yinnii fana gayda.

*Yesuusa Geetesemaane woossida
(Maato. 26:36-46; Luqa. 22:39-46)*

³² Geetesemaane gaaze besa hyanggida; Yesu-
usa fa tamaruntsago, «Taanii Xooz woossii
maaqqade wonsis yin hyanne bettote» yagayda.

³³ Yesuusa Phexiroosa, Yayqoobaran
Wahannisa faara ekkii qitida; gaama waayintti
un7inttida.

³⁴ Mahi unttago, «Taanii hyayqqode wonsis az-
zanida, hyanne gam7ote; genttippete» yagayda.

³⁵ Eeratsi tiino shiiqii, sa7alla bunqunttii,
dandda7inttize baz maaqqiko, hyanna waaye
saata faappa aadhode gaar, Xooz woossida.

³⁶ Mahi, «Ababa, ta Adayo, ubba bazita nees
dandda7inttane, hyanna waaye xuu7uto taappa
hyaaso. Yezin ne qofta hyanop attin ta qofta
hyanippe» yagayda.

³⁷ Yesuusa maaqqii yi7i, un genttezin denggi,
Phexiroosago, «Simoon, genttida? Neenii fettii
saaten barkki naagodes dandda7osa?

³⁸ Madha yin gelaame gaar barkki naagii Xooz
woossote. Ayyaana giigida, yezin yin ashita
labbitsi» yagayda.

³⁹ Mahika hyanggi tiinosttifana Xooz woossida.

⁴⁰ Fa tamaruntsago suub maaqqii ye7ize wode
genttezin denggida. Un aafto gentto goozii
aykkide gisho E akko ohizakon eroos.

⁴¹ Hyaydzintsa unttago yi7i, «Hyanno yellodes
genttii shemppolla? Yikke, maaqqada; saata
yellida; bo7ote! As Na7ay, nagaranchcha asuntsis
aadhii ingginttode wodita yellida.

⁴² Denddii yedhdhote; bo7ote, tana aatsii ing-
goday yellida» yagayda.

Yesuusa fa morkkunts kushite aykinttida
(Maato. 26:47-56; Luqa. 22:47-53; Waha. 18:3-12)

⁴³ Yesuusa yinno hyaga ohodera, taphpho lam77i E tamaaruntsappa fete, Yihuda, ellisii yellii ashshida. Mahi kahinunts hyalaquntsi, higge asttamaaruntsin cimuntsi kiittin, mashshan gufen aykkii gaama asuntsi eera wolla yi7ida.

⁴⁴ Yesuusa aatsii inggiday yentsi gaama asuntsis, «Taanii yeerizay eza; eza aykkii, mintstsii naagii, ekkii kanggote» yaga7i malla ohi gaddida.

⁴⁵ Yihuda yellii wodhdhide gaar Yesuusago shiiqii, «Astattamaarzo» yaga7i Yesuusa yeerii ekkida.

⁴⁶ Yentsi gaama asuntsi Yesuusa aykkida.

⁴⁷ Yezin kale eqqiduntsappa fete fa mashshiza shoddii kahinunts hyalaqize ariza guuddii, E hyayza gachchii olida.

⁴⁸ Yesuusa mahi, yentsi asuntsago, «Tana faanno mahi, faanno aykkzefana aykkodes mashshan gufen aykkii yi7idate?

⁴⁹ Taanii Xoozze Keetsta tamaarsitera, ubba wode yinttara yeze wode tana aykkikaayzara, yezin Geeshi Maxaafite ga7idanna folinttodes beezane» yagayda.

⁵⁰ E tamaaruntsi ubbuntsi eza ashshii ashshii lalinttida.

⁵¹ Laxana xalaala ma77ide fettii na7atitsi attsa Yesuusa kaallizaya asuntsi aykkida.

⁵² Yezin ye atstse laxinza ashshii ashshii, xira kallo woxxi qitida.

Yesuusa firda Shanggo tiino kanggida
(*Maato. 26:57-68; Luqa. 22:54-55, 63-71; Waha. 18:13-14, 19-24*)

⁵³ Asuntsi Yesuusa kahinunts hyalaqize keetsta kanggida. Ize kahinunts hyalaquntsi, cimuntsin higge asttamaaruntsi shiiqii yene.

⁵⁴ Phexiroosa kahinunts hyalaqize woofa yelodes hyaakora eza kaallii hyanggi ize kiitintizuntsara bettii tama kaazhane.

⁵⁵ Kahinunts hyalaquntsin firda shangguntsi ubba Yesuusa wodhodes eella afa markka koyda, yezin akkon denggikaaya.

⁵⁶ Gaama asuntsi eella afa worddo markkidhida, yezin un markkatitsita fetto baaya.

⁵⁷⁻⁵⁸ Fettii fettii asuntsi denddii eqqii Yesusalla, «E, <Taanii asi keexide hyanna Xoozze Keetsito lalii, asi kushera keexinttikaayze melle Xoozze Keettsi hyaydzdzii qamma gidda keexoda> ga7odera nuunii si7ida» yaga7i worddo markkidhida.

⁵⁹ Maaqqo yezin, un markkatitsita yinnan fetto baaya.

⁶⁰ Kahinunts hyalaqize as ubbunts tiintte denddii eqqii, «Hyantses nena mootize mootis ne mahizebaz baa?» yaga7i Yesuusa oocida.

⁶¹ Yezin Yesuusa si77i gayda; akkon mahikaaya. Kahinunts hyalaqize, «Anjjintide Xoozze Na7ay, Kiristtoosa nenane?» yaga7i mahi oocida.

⁶² Yesuusa mahi, «Yee tana, yin As Na7ay, wolqqaama Xoozzeppa mizaqi zalara bettezin mahi salo dhonnera ye7odera be7ada» yagayda.

⁶³ Kahinunts hyalaqize fa ma7ito feedhii, «Nuus melle markka akko koshshe?

⁶⁴ Yin E cashito si7ida; yin qoftta akko?» yagayda. Un ubbuntsi, «E hyayqqodes beezane» yaga7i eella afa firddida.

⁶⁵ Unttappa fete fete eella afa cutte aykkida. E aafto goozii baqqittera, «Nena qoxxide oode? Ane nuus oho!» yagayda. Naagizuntsi eza guudditera kanggida.

Phexiroosa Yesuusa kaddida

(Maato. 26:69-75; Luqa. 22:56-62; Waha. 18:15-18, 25-27)

⁶⁶ Phexiroosa kahinunts hyalaqize woofa yeekka zalara yezin, kahinunts hyalaqize maachi aruntsappa fetta ize yi7ida.

⁶⁷ Phexiroosa tama kaazhanno bi7i, dakkii loytsii bi7i, «Neenin Naazirete Yesuusara yene» yagayda.

⁶⁸ Yezin Phexiroosa, «Ne gaazana akko yeza-kon ta eroosin, taas tiirintoos» yaga7i kaddida. Yaga7i maaqqii woofa kezida [iira lukule oollida][†].

⁶⁹ Yinna arita Phexiroosa bi7i, E kale eqqide asuntsago, «Hyay attsen untara yene» ga7i mahi ohida.

⁷⁰ Yezin Phexiroosa mahin kaddida. Eeratsi gam7odera, kale eqqide asuntsi mahi

14:62 Dane. 7:13 **14:64** Leewe 24:15 [†] **14:68** Fettii fettii maxaafite iira lukule oollida gaazana baaya

Phexiroosago, «Neenii Galila sa7a asi maaqqide gisho turo untara yene» yagayda.

⁷¹ Yezin Phexiroosa, «Taanii yin gaaze attsa eroos!» yaga7i fana baadditera caaqo aykkida.

⁷² Iira lukule lam7intsa oollii ashshida. Phexiroosa Yesuusa eego, «Neenii lukule lam77i tohe oollodannippa tiino hyaydzdzii tohe tana kaddoda» eego gaydanno tiirii yeekkida.

15

Yesuusa Philaaxoosago kanggida

(Maato. 27:1-2, 11-14; Luqa. 23:1-5; Waha. 18:28-38)

¹ Wontta gooda ellisii kahinunts hyalaquntsi, cimuntsi, higge asttamaaruntsin firdda shang-guntsi ubba shiiqii zorinttida. Unttii Yesuusa accii kanggi Philaaxoosas aatsii inggidda.

² Philaaxoosa eego, «Neenii Ayhudunts kaati?» yaga7i oocida.

Yesuusa mahi, «Ne gayda» yagayda.

³ Kahinunts hyalaquntsi Yesuusa gaama bazara mootida.

⁴ Yezin Philaaxoosa mahi Yesuusago, «Nees mahizebaz baa? Unttii neella akko mooto ke7izako bo7oso?» yagayda.

⁵ Yezin Yesuusa mellebaz mahanxi ixxin, Philaaxoosa gaama qoppida.

Yesuusa hyayqqo ga7i firddida

(Maato. 27:15-26; Luqa. 23:13-25; Waha. 18:39-40; 19:1-16)

⁶ Philaaxoosas Faasiga Ba7aale bonchchize gammite asuntsi koyze fettii asi achchappa billize woga yene.

⁷ Ye wode fettii Barbaana gaaze atstse kachchi dentsii shemppo wodhide asuntsara wolla achi keetsta yene.

⁸ Gaama asuntsi Philaaxoosago yi7i tiinoppa yizitera gam7ide fana oochchode gaar eza oocida.

⁹ Philaaxoosa asuntsana mahi, «Taanii yinttis Ayhudunts kaatiza billode gaar koyane?» yaga7i oocida.

¹⁰ Yinno E ga7idanna, kahinunts hyalaquntsi Yesuusa qanaatii aatsii inggidanno erize gisho.

¹¹ Yezin kahinunts hyalaquntsi E gisho Barbaana billode gaar, yentsi shiiqide asuntsi Philaaxoosa woossode gaar asuntsana zorida.

¹² Philaaxoosa mahi, «Yeezin, yin Ayhude kaati gaazaya wayssa?» yagayda.

¹³ Asuntsi Philaaxoosalla afa uukki, «Masqalalla afa eza suxxo» yagayda.

¹⁴ Philaaxoosa asuntsago, «Akkoso? E akko iita baz oochchido?» yagayda.

Yezin asuntsi tiinostippa gujjii uukki, «Masqalalla eza suxxo» yagayda.

¹⁵ Philaaxoosa asuntsana ufayssodes koyi, Barbaana asuntsis billida; yeyzi allanggara Yesuusa garafii, masqalalla afa suxxode gaar aatsii inggida.

Wottaddaruntsi Yesuusa leqqida

(Maato. 27:27-31; Waha. 19:2-3)

¹⁶ Yinnippa maaqqii, wottaddaruntsi Yesuusa ekkii Piratoriya gaaze Poolis xaaba kanggi, melle wottaddaruntsana ubba fettilla xegida.

¹⁷ Mahi zoqo afula eza mayzida; anggatsi zawude giigizii, E ommite gaddida.

¹⁸ Yinnippa maaqqii, eego, «Ayhudunts kaati-zayo saro» yaga7i, kushe dentsida.

¹⁹ E ommite gufera guuddida; mahi eella cut-tida; bunqquntii ees goynida.

²⁰ Eza toochidannippa maaqqii zoqo afula eeppa qaarii ekkii, E afultto eza ma7isii masqalalla afa eza suxxodes ekkii kanggida.

Yesuusa suxxida

(Maato. 27:32-44; Luqa. 23:26-43; Waha. 19:17-27)

²¹ Un hyanggitara, Iskkinddirenen Rufoosa aday, Simoona gaaze Qereena sa7a asi, gaxareppa katama ye7izera yellintti, Yesuusa masqala wolqqara toossida.

²² Yeyzi Golggotta gaaze bessa Yesuusa kang-gida. «Golggotta» gaazanna «Omma ota» ga7e.

²³ Hyargaame fana karbbe gaaze gaalla worqqinttide woyne uzho ga7i ees inggida. Yezin E uzhanxi ixixida.

²⁴ Unttii masqalalla afa eza suxxida. Oona akko yellodyezakon ga7i E afultto shagii ixa olida.

²⁵ Un masqalalla afa eza suxxize wode wont-tappa hyaydzdzii saate.

²⁶ Un, «Ayhudunts kaat» yaga7i eza mootize xuufe xaafii gaddida.

²⁷ Yesuusara lam77i faanuntsana feta eeppa mizaqi zalara hyankkaya eeppa workkita zalara masqalalla afa suxxida.

²⁸ Geeshi Maxaafite, «lita baz oochchide asuntsara E faydinttida» ga7inttidanna folinttida.

²⁹ Ogera aadhize asuntsi Yesuusa leqqii, fa ommito en7izi cazzhida; «Zambbay! Xoozze Keetsito lalii hyaydzdzii qamma gidda keexizayo, ne ommito ashsho;

³⁰ ane masqalizeppa wodhdhii nena ashsho» yagayda.

³¹ Yinnii gaara, kahinunts hyalaquntsi higge tamarssizuntsara fettilla Yesuusa leqqii, «Melluntsana ashshida, yezin fana ashshodes dandda7oos;

³² nuunii bi7i ammanode gaar Kiristtoosa, Isra7eele Kaati, ane masqalappa hyatte wodhdho» yagayda. Mahi melle atto yezin, eera masqalalla afa suxunttiduntsappa eza leqqida.

Yesuusa hyayqqida

(Maato. 27:45-56; Luqa. 23:44-49; Waha. 19:28-30)

³³ Izippun saateppa dentsii, uddufun saate yelodes sa7ita ubba dhumida.

³⁴ Uddufun saate Yesuusa fa qaaltto dhoqi yiizii, «Elohee, Elohee, laama sabaqitani?» yagayda. Yinnii bilitsita, «Ta Xoozayo, ta Xoozayo, tana akkos ashshido?» ga7e.

³⁵ Ize eqqide asappa fete fete yinno si7i, «Yikke, Eeliyaasa xeeqane» yagayda.

³⁶ Yentsi asuntsappa fete woxxii, gurba fuzara caala woynne baazhii; gufe bertstsalla gaddii, «Naagote; Eeliyaasa masqalappa eza ketstsodes ye7odyezako ane bo7oda» yaga7i Yesuusa doon-ago ushshodes shiishida.

³⁷ Yesuusa fa qaaltto dhoqi yiizii uukki, hyayqqida.

³⁸ Xoozze Keetsta suxunttide magaraajita wokkappa sulle gaxa yellodes, lam77i kezii feed-hinttii wodhdhida.

³⁹ Masqalzeppa tiino zalara ize eqqide fettii mato hyalaqize, Yesuusa wayzi hyayqqezako bi7ide wode «Hyay atstse turo Xoozze Na7a» yagayda.

⁴⁰ Yinno hyaakora eqqii be7ize eerats maachuntsi yene. Un gidda Magdela Mayrama, geezze Yayqooban Yoosa intta Mayramiran Salooma yene.

⁴¹ Yentsi maachuntsi Yesuusa Galila yeze wode eza kaalliduntsanan eza mokkiduntsana mahi Yesuusara wolla Yerusalaame hyanggide melle gaama maachuntsi ize yene.

Yesuusa mooginttida

(Maato. 27:57-61; Luqa. 23:50-56; Waha. 19:38-42)

⁴²⁻⁴³ Sa7ita uguride wode shiiqide asunts gidda bonchchinttide Ayhude shangguntsappa fete, Yoosefa gaaze atstse, Xoozze ka7itumo yo7odanno naagitera yeze, Armmatiyasa katama asi yezay yi7ida. Wonttiste Sambbatas giiginttize qamma maaqqide gisho Yoosefa miinggi Philaaxoosago hyanggi, Yesuusa ahito ekkodes woossida.

⁴⁴ Philaaxoosa Yesuusa hyayqqidanno si7ide wode gaama qoppida; mato hyalaqiza xeezii, «E hyayqqi gam7ida?» yaga7i oocida.

⁴⁵ Philaaxoosa Yesuusa hyayqqidanno mato hyalaqizeppa si7i E ahito Yoosefas inggida.

⁴⁶ Yoosefa moogo afula wonggi; Yesuusa ahito masqalappa ketstsii, afulara xaaxii, shuchchappa woocinttide booza gidda E ahito moogida. Mahi yinna booziti doontte damma shuchchi gol7izi gaddida.

⁴⁷ Magdela Mayramiran Yoosa intta Mayrama Yesuusa ahito un aanne gaddizako be7ine.

16

Yesuusa hyayqoppa denddida

(Maato. 28:1-8; Luqa. 24:1-12; Waha. 20:1-10)

¹ Sambbata aadhidannippa suuba Magdela Mayramo, Yayqooba intta Mayramiran Salooma hyanggi, Yesuusa ahito tishshades shitto wonggida.

² Wogga wode wontta gooda xalqe kessadera, booza hyanggida.

³ Un fa gidda fetay fetayra, «Booziti doonttippa nuus shuchchito oode gol7izi hyaasode?» yaga7i ohinttida.

⁴ Un be7ize wode ye anddir damma shuchchize bunbbulunttii hyal7idanno bi7ida.

⁵ Yesuusa mooginttide booziti gidda gelize wode fettii yidhdho dhiiratsay bootsi ma7o ma77i, mizaqi zalara bettiday bi7i tannida.

⁶ Yezin E unttago, «Tannippete; masqalalla afa suxunttide, Naazirete Yesuusa yin koyzanno taanii erane. E hyanne baaya, hyayqoppa denddida. Un eza moogide bessito hyanno bo7ote.

⁷ Hyatte hyanggi Yesuusa tamaaruntsisin Phexiroosas, «Yesuusa yinttappa tiinidhii Galila aadhida. E yinttis ohidanni fana yin eza yeyga be7ada» ga7i ohote» yagayda.

⁸ Maachuntsi zhashmora goqii boozitippa kezii aachinttida. Mahi un zhashtize gisho yinno oodesin akkon ohikaaya.*

Yesuusa Magdela Mayramis benttida

(Maato. 28:9-10; Waha. 20:11-18)

⁹ Yesuusa hyayqoppa denddidannippa maaqqii wogga wode wontta, laappun tuna ayyaanuntsana kesside Magdela Mayramis tiinidhii benttida.

¹⁰ Iza hyanggi eera tiino yezuntsis, un azzaniteran yeekkittera yezin ohida.

¹¹ Yezin Yesuusa faxa yezannon iis benttidanno un si7ide wode iza gaazanno ammanikaaya.

Yesuusa lam77i fa tamaaruntsis benttida

(Luqa. 24:13-35)

¹² Yinnippa suuba, untappa lam77untsi katamappa kezii hyammadera, ogella afa Yesuusa tiinoppa dumudhii unttis benttida.

¹³ Un suub maaqqii, melluntsis ohidap, attin melluntsin un ohito turo gaykaaya.

16:7 Maato. 26:32; Mar. 14:28 * **16:8** Fetti fetii zaga maxaafuntsi Marqqoosa Wonggele faydo 8 lla afa essane. Mahi fetii fetii maxaafuntsi faydo 9-20 yellodes yeze qoftto gujjoos. Maaqqikon melluntsi, faydo 8 kaallii yezanno gujjane. Yinnan [Maachuntsi hyanggi, kiitanchcho ohidanno ubba Phexiroosan eera yezuntsis hyaataro ohida. Yinnippa suuba, Yesuusa fa tamaaruntsana geeshin medhina atositsi Wonggele kiitto awa kessappa awa gelo yellodes kiittida]

Yesuusa taphpho fettii fa tamaaruntsis benttida
(*Maato. 28:16-20; Luqa. 24:36-49; Waha. 20:19-23; Hawa. 1:6-8*)

¹⁴ Suubappa taphpho fettii E tamaaruntsi katstsa ma7adera, Yesuusa unttis benttida. Unttis ammano baayze gishon hyayqoppa E denddi-danno bi7ide asuntsi ohin un ammananxii ixside gisho E untтана borida.

¹⁵ E unttago, «Sa7a ubba qitii as ubbuntsis Wonggele ohote.

¹⁶ Ammanidayin xammaqinttiday attoda, yezin ammanoose firddinttoda.

¹⁷ Ammanzuntsis hyanna mallita ingginttoda. Un ta suntsite tuna ayyaana kessoda, kille doonara ohinttoda.

¹⁸ Un shooshi aykkikon woy wodhizebaz uzhikon untтана qohaama. Mahi un fa kushito hyargginttizuntsalla afa gaddii untтана fatstsoda» yagayda.

Yesuusa ude Salo kezida
(*Luqa. 24:50-53; Hawa. 1:9-11*)

¹⁹ Laatstsii Yesuusa tamaaruntsara ohinttidan-nippa suuba ude salo kezida; Xoozzeppa mizaqi zalara bettida.

²⁰ E tamaaruntsi qitide bessa ubba qaala ohida. Laatstsин untтara wolla oochchane. Unttii ohize qaaltta turo maaqqidanno Xoozii unttis inggide mallite miintsane.

Kille Caaqo
The New Testament in the Oyda language of Ethiopia,
Latin script

copyright © 2025 The Word for the World International

Language: (Oyda)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-20

PDF generated using Haiola and XeLaTeX on 19 May 2025 from source files dated 20 May 2025

6edc256e-39e9-59ad-86cf-e1d4328a7cf2